

M537: Christherre-Chronik

- 0,1 CRist h're keiser ub' alle craft
0,2 Voit himelischer h'schaft
0,3 Got kunic ub' allir e-gel h'
0,4 Dir dienit gar an alle wer
0,5 Swaz in sinem namen ie
0,6 Geschepfethe eigenschaft entphie
0,7 Du bist in der gewalde din
0,8 Der vnuorloschen sunnenschin
0,9 Der imm'e lebende ane endes czit
0,10 Licht aller lichte schine git
0,11 Got einiger vnd drier
0,12 Vnuorkertir wandeles vrier
0,13 In der heiligen trinitat
0,14 Di einige . drie namen hat
0,15 Vnd driualt in dim namen ist
0,16 In dinir gotheit du bist
0,17 Beczeichent mit der sunnen
0,18 Vrsprinch . des lebenden brunnen
0,19 Der in alle hercze vluzeth
0,20 Vnd towende beguzeth
0,21 Mit siben runsen al di lebin
0,22 Den du daz lebin hast gegeben
0,23 In menschlicher wisheit
0,24 Volkumens menschenlebin treit
0,25 Von s heilegen geistes siben gebin
0,26 Sin . vornunpht vornunphtlich lebi-
0,27 Diz is der sibenvaldic vluz
0,28 Der von dir vluzet . vnd des guz
0,29 Dir iclich hercze reinit
0,30 Daz dich mit truwen meinit
0,31 IN mislichir vnderscheit
0,32 Hat des heilegin geistes wisheit
0,33 Geteilet mensliche vornunst
0,34 Einim witze dem andren kunst
0,35 Teilit der heilige geist
0,36 Einim git her allermeist
0,37 In mangeln czungen suze wort
0,38 Dem andren wiser rede hort

0,39 Der dutunge . der rede treit
0,40 Einim git her gesuntheit
0,41 Einim tugende hoen gewin
0,42 Einim vordachtlichen sin
0,43 Daz er kunstliche dinc vorstat
0,44 Bescheidenheit des geistes hat
0,45 Des andren sin mit richer craft
0,46 Von s heilegin geistes meisterschaft
0,47 Des gehe di gobe teilen kan
0,48 Einim iclichen als her im gan
0,49 Vnd in di gobe teilen wil
0,50 Als mit vor geordenten czil
0,51 Vnsers heren gotisrat
0,52 Di gobe vor hin geordent hat
0,53 IN dem selbin namen hie
0,54 Bouge ich mines herczen knie
0,55 Vnd bite dich uil suzer crist
0,56 Sint daz din gotliche list
0,57 Mich armen tumben sunder hat
0,58 Geschaffen tzu einer hantgetat
0,59 Daz du mir vuges den gewin
0,60 Daz minen wandelberen sin
0,61 Vnde min suntlich gemute
0,62 Des heilegen geistis gute
0,63 Mit sinem towe begize
0,64 Vnd in dinem namen uf slize
0,65 Miner touben si-ne tor
0,66 Mit den mir hat beslozen vor
0,67 Mit tumpheit richer sinne craft
0,68 Vn- wiser worte meisterschaft
0,69 Daz ich leider cleine han
0,70 Vnd geruche in min gemute lan
0,71 So wise sinne mit vornunst
0,72 So rechte rede . so wiser kunst
0,73 Vnd so bescheidenliche wort
0,74 Daz dich miner czungen ort
0,75 Also geloben muze
0,76 Vnd dines hoen lobes suze
0,77 Daz iz dir herre anuenclich si
0,78 Wan wonte mir der sinne bi
0,79 Noch sechse der ich einin han
0,80 Iz were ein czwifillicher wan
0,81 Dannoeh daz iz vollenbracht
0,82 Wurde . des ich han gedacht
0,83 Czu tichtene . in dem name- din
0,84 Nu tu mir lere vnd helfe schin
0,85 Durch der drier namen ere
0,86 Mit des heilegin geistes lere

0,87 Vnd sende mir zu helfe di
0,88 Daz ich in dinem namen hi
0,89 Di rede bringe biz an daz czil
0,90 Der ich mit dir beginnen wil
0,91 Czu tichten . h're in dinem namen
0,92 Hoen suzzen lobesamen
0,93 Ich wil als ich han gedacht
0,94 Mac iz werden uollenbracht
0,95 Alhie mit cranken sinnen
0,96 Der besten rede beginnen
0,97 Der sich uor mir ie dutscher man
0,98 Czu tichten sold ie genemen an
0,99 Der besten ia . daz sprech ich wol
0,100 Daz ich also sprechen sol
0,101 An starken sinnen vil gewerin
0,102 An meren vnwandelberin
0,103 Ist si di beste des ie ich
0,104 Doch wil ich des nicht rumen mich
0,105 Daz iz in dutscher erde
0,106 Daz beste getichte werde
0,107 Oder guter spruche daz beste si
0,108 Daz uns dutschen wonit bi
0,109 Vnd spreche ich daz so were ich
0,110 Wol wert daz man strafte mich
0,111 Ich ie abir des von der warheit
0,112 Daz iz di hosten sinne treit
0,113 Di dutsche kunst berichten kan
0,114 Si hat uor mir ein wiser man
0,115 Geschriben vnd getichtet
0,116 Vnd in latine berichtet
0,117 Der hoer kunst ein meister was
0,118 Swo man von kunst an buche- las
0,119 Der was von biterne irkant
0,120 Vnd was gotfrit genant
0,121 Ein phaffe an kunst uolkumen
0,122 Vnd an wisheit uz genumen
0,123 Daz bewerit di materie wol
0,124 Daz man im des iehen sol
0,125 Der selbe begunde suchen
0,126 Vnd suchte an den buchen
0,127 Den hort di gruntfeste der schriph
0,128 Di urhabunge vn- ouch di stipht
0,129 Der alden vnd der nuwen e
0,130 Do bi las er der buche me
0,131 Di uon der nature sagent
0,132 Vnd di beczeichnunge tragent
0,133 Der phylosophyen
0,134 Di kunst nam er czu amien

0,135 Vnd si in wider czu amise
0,136 Der kunsteriche wise
0,137 Czu m ersten an sinem buche seit
0,138 Wi goth an siner gotheit
0,139 Was e daz sine hoe craft
0,140 Geschufe i cheine geschafft
0,141 Vnd wes er here was erkant
0,142 E . cheine geschefte wurde genant
0,143 Dar noch sait er biz an den ort
0,144 Wi daz hoe gotiswort
0,145 Alle creature werden hiz
0,146 Sin kunst uns dar na wizen liz
0,147 Kurczlich rechte vnd doch wi
0,148 Iz adamis kinden irgi
0,149 Wo sich di nach im lizen nider
0,150 Vnd wi di lant teiltin sider
0,151 Vnd wi di waren genant
0,152 Di heren waren uber di lant
0,153 Er sait ouch wi di hizen
0,154 Di in wizen lizen
0,155 Di buch iniclicher e
0,156 Wer di vumf buch von moyse
0,157 Vnde di alden e . berichte
0,158 Vnd in latine tichte
0,159 Di hat er genennit sus
0,160 Moyses . esdras . vnd iosephus
0,161 Daniel vnd andere wissagin
0,162 Ih-c sirac di in den tagin
0,163 Schriben di geschicht der czit
0,164 Daudid salomon iudit
0,165 Ester vnd machabeus
0,166 Di buch ouch nennit er alsus
0,167 Di cristen e geschriben hant
0,168 Als sie hi geschriben stant
0,169 Paulus vnd di czuelf botin her
0,170 Noch git er uns urkundes mer
0,171 Wi di geheizcen waren
0,172 Di da schribin in ir iaren
0,173 Den gelouben der cristen
0,174 Di vire ewangelisten
0,175 Des gelouben fundamente
0,176 Der pabis sente clemente
0,177 Origenes vnd dyonisius
0,178 Vnd Iohannes crisostomus
0,179 Athanasius vnd ieronimus
0,180 Augustinus vnd gregorius
0,181 Vnd andere lerere vil
0,182 Der ich alhi nicht nennen wil

0,183 DOch wil ich uch benennen
0,184 Daz ir sie mugit irkennen
0,185 Di der heiden cronike tichten
0,186 Vnd in latine berichten
0,187 Iosephus der einer was
0,188 Der di buch der dite las
0,189 Dyonisius vnd orosius
0,190 Egesippus vnd swetonius
0,191 Solinus vnd iulius
0,192 Vnd einer hiz affricanus
0,193 Der von erst der erste was
0,194 Der croniken schreip vnd las
0,195 Vnd der kunige geschicht
0,196 Von den kaldein hat uns bericht
0,197 Der kunige buch berosus
0,198 Ein buchtichter hiz alsus
0,199 Der mit schripht di mer uns gab
0,200 Von erste des landes urhab
0,201 Der kunige lebin vnd ir tot
0,202 So hat der wise mamenot
0,203 Von egyptenlant geseit
0,204 Des landes geleginheit
0,205 Al ir geschicht wi di geschach
0,206 Swes sin schripht da uon uoriach
0,207 Daz dutte sint ieronimus
0,208 Mobeus vnd ouch estius
0,209 Der allir schripht urkunde hat
0,210 Von der allirersten getat
0,211 Daz di werlt sich hub an
0,212 Vnde von erst wachsen began
0,213 Vnd wi sich in ir cziten
0,214 Di lant teilten vil witen
0,215 Als di kunicriche sint gelegin
0,216 Di der lande soldin phlegin
0,217 Vnd wi di vnder sich di lant
0,218 Teiltin ouch hat er genant
0,219 Di lant almeistic in asia
0,220 In europa vnd in affrica
0,221 Di al der erdent geleginheit
0,222 Begriffen gar als di schrift seit
0,223 Nu ist der lantnamen so vil
0,224 Daz ich ir nicht nennen wil
0,225 Wan her nach mit den meren
0,226 Dan so sal ich uch beweren
0,227 Ir namen mit der warheit
0,228 Als uns des buches meister seit
0,229 Daz buch beginnet hebin an
0,230 Von adam dem ersten man

0,231 Vnd sait mit kurzlicher sage
0,232 Czil . iare mande vnd tage
0,233 Allir der herscheffe
0,234 Di mit gewaldis crefte
0,235 Alle in ir lebenden iaren
0,236 Der lande heren waren
0,237 Von aneenge biz an di vrist
0,238 Daz goth unser herre ih-c crist
0,239 Von hymele uf di erde quam
0,240 Vnd mit geburt an sich nam
0,241 Durch uns di brode menscheit
0,242 Vnd durch uns alliz daz irleit
0,243 Dar vm er mensche was genant
0,244 Mit namen tut er ouch bekant
0,245 Di pabise von sente petirs czit
0,246 Di czu rome pabse worden sit
0,247 Daz er keines name- virgaz
0,248 Biz daz an den stul gesaz
0,249 Der pabs sente vrbanus
0,250 Der dritte den man nante sus
0,251 Vnd alle romische herschapht
0,252 Biz an di wile daz mit craft
0,253 Der elder keiser vridrich
0,254 Vn- des sun kunic heinrich
0,255 Der ouch sint keiser wart genant
0,256 Der sicilie twanc daz lant
0,257 Romische richtere waren
0,258 In disen selbin iaren
0,259 Tichter des buches vrhab
0,260 Der pabist orthabunge gab
0,261 Dem buche vn- dem getichte do
0,262 Vnd gab des urkunde also
0,263 Daz iz ein warheit were
0,264 Ane ualsch unwandelbere
0,265 Nach des buches warheit
0,266 Vn- der uil gewerin vnderscheit
0,267 Di ouch uns dutet anderswa
0,268 Scolastica historia
0,269 Ein buch ist alsus genant
0,270 Daz ouch wislich tut irkant
0,271 Des angengis gelegenheit
0,272 Vnd al bescheidenliche seit
0,273 Der mer wurczel vnd ir craft
0,274 Nach wunschlicher meisterschaft
0,275 Wil ich arbeiten mine kunst
0,276 Vnd miner sinne uirnunst
0,277 Durch got vn- durch der tuginde rat
0,278 Des gebot mich des gebetin hat

0,279 Daz dr an erbeite mich
0,280 Min here lantgreue heinrich
0,281 Von duringen der uurstē wert
0,282 Der des hat an mir gegert
0,283 Daz ich daz buch berichte
0,284 Von latin in dutsch getichte
0,285 Des dinstes vnd der arbeit
0,286 Sol ich im gerne sin bereit
0,287 Vnd allen werden luten
0,288 Mit spruchen durch in duten
0,289 Daz buch so uil ich tumber man
0,290 Mit tichtene gedienin kan
0,291 Vf den lon swer iz lese
0,292 Daz er im wunsche wese
0,293 Vurstenlicher werdecheit
0,294 Mit werenden vroiden sundir leit
0,295 Iz si man oder reine wip
0,296 Daz in got sele vnd lip
0,297 Beware nach den gnaden sin
0,298 Nu wil ich di sinne min
0,299 Pinen mit arbeitlicher kur
0,300 Vnd wil uch hi legen vur
0,301 Mit tumbin sinnen alzu cranc
0,302 Des buches urhab vnd anuanc
0,303 Genuge vragent noch also
0,304 Wo was got unser here do
0,305 Do nirgen creature schein
0,306 Gemachet noch geschefte chein
0,307 Het ich nu sulche wisheit
0,308 Iz wurde uch nu uon mir geseit
0,309 Nu bin ich ein so tumber man
0,310 Daz ich z nicht wol gesagin kan
0,311 Noch berichten doch wil ich
0,312 Ein teil des di schrift wiset mich
0,313 Berichten mit der helfe gotis
0,314 Vnd der ler sinis gebotis
0,315 Got was do als er noch ist
0,316 Vnd immir ist ane endes vrist
0,317 In der gotlichen gotheit
0,318 Di er hatte an sich geleit
0,319 Al di geschefte an seinde
0,320 Vnd eigenliche speinde
0,321 An ir di forme z allir czit
0,322 Di er ir gebin wolde sit
0,323 Vnd sach di geschaft i bi im an
0,324 Als noch ein wiser czimmerma-
0,325 In sinem hercze- trachtet
0,326 Mit vurgedanken vnd achtet

0,327 Mit wiher hande sachen
0,328 Er sin hus welle machen
0,329 Vnde ymaginiret daz .
0,330 Sus vnd so i baz vnd baz
0,331 Biz daz er z uolbringet
0,332 Als sin vurgedanc gedinget
0,333 Sus hat sins herczen ansicht
0,334 Des huses namen biz iz geschicht
0,335 Daz er z gemacht iz ist czuhant
0,336 Mit dem gemache ein hus genant
0,337 Allen den di iz danne sehin
0,338 Vnd sin structure spehin
0,339 Da uor siet ez der czimberman
0,340 Nicht wan mit dem herczen an
0,341 Di wile daz sin vurgedanc
0,342 Im erdenkit den anuanc
0,343 Alsus was alle geschafft
0,344 E si mit namen gewunne craft
0,345 Vor gotis gesichte tougen
0,346 Mit warheit sunder lougen
0,347 I . an gesen vnd uor bedacht
0,348 Biz daz si wart vollinbracht
0,349 Sus was ane angenge
0,350 Vor ewiclicher lenge
0,351 Di werlt bi gote gemacht i
0,352 Biz daz iclich geschafft intphi
0,353 Mit der nature ir geschafft
0,354 Ir eigenschaft . ir name- ir craft
0,355 Do uon stet also geschriben
0,356 Daz got nicht elder si beliben
0,357 Der iare dan si geschefte si
0,358 Wan sie im i wonte bi
0,359 Mit gedanken als ich han geseit
0,360 Er ist aber an der werdecheit
0,361 Elder vnd an gewaldes craft
0,362 An immir wernder herschaft
0,363 Wan er uon erste den urhab
0,364 Einir iklichen geschefte gab
0,365 Di wisen philosophi
0,366 Den kunst mit wisheit wonte bi
0,367 Nennint iene werlt alsus
0,368 Mundus archetypus
0,369 Als si do was e si geschafft
0,370 Gewunne uon der gotis craft
0,371 Dirre name archetypus
0,372 Czu latine sich dutet sus
0,373 Mit rechter dutunge
0,374 Typus quit bezeichnungen

0,375 Arche ist ein beslozzzen vaz
0,376 Wi sold ich daz bescheiden baz
0,377 Mit gewarer dutunge
0,378 Di beslozzin beczeichenunge
0,379 Di nach vurgedanken wart
0,380 Sider offen vnd uf gespart
0,381 Do di werlt nach ir orden
0,382 Geschefte was worden
0,383 Als si da uor e was bericht
0,384 Vor unseris schepheris ansicht
0,385 Der di geschefte algemeine
0,386 Si were groz odir cleine
0,387 Nider ho smal breit stark swach
0,388 In siner wisheit an sach
0,389 Do uon ist gotis name irkant
0,390 In krischen vnd genant
0,391 Theos der alli dinch an sicht
0,392 Vnd dem ist uor virborgn nicht
0,393 Wan er i sach alle dinch
0,394 Vnd ir geschefte ursprinch
0,395 E daz si wurden uollenbracht
0,396 Vnd in ir namen wurden irdacht
0,397 Got was i in der gotheit
0,398 Di er hatte an sich geleit
0,399 In unuerwesinlicher craft
0,400 Vnd in ewiclicher herschaft
0,401 So schone daz der engel schar
0,402 Di uon im sint irluchtet gar
0,403 Vnd alsulcher schone phlegint
0,404 Daz si der sunne widerwegint
0,405 Sine schone sibenvalt
0,406 Als ez gebutet gotis gewalt
0,407 Des gerint daz si n an sehint
0,408 Vnd sine schone spehint
0,409 Swi uil in di an gesehint
0,410 Swi uil sie sine schone spehint
0,411 Ir wunschlich gir ir angesicht
0,412 Mac sich doch sin genugen nicht
0,413 Dicheine stat mac begrifen got
0,414 So creftenrich ist sin geboth
0,415 Vnd vullet himel vnd erde idoch
0,416 Iz in ist kein so enge loch
0,417 Er n sie dr inne vnde doch nicht
0,418 Mit craft vnd nicht mit gesicht
0,419 Sus can er sich geteilen wol
0,420 Daz himel vnd erde sin sin uol
0,421 Vnd doch nirgin hi noch do
0,422 Ist noch dort noch anderswo

0,423 Wan allinthalbin ist sin craft
0,424 Gancz bi siner geschafft
0,425 Doch nicht also daz er do si
0,426 Sin gewalt ist allin dingen bi
0,427 Des ist sin craft gewaldic
0,428 Einige doch driualdic
0,429 Was got i in der gotheit
0,430 Der enualden driualdekeit
0,431 Git der sunnen ebenmaze wol
0,432 Als ich uch hi bescheiden sol
0,433 Der sunne ist ein enic dinc
0,434 Vnd beluchtet der werlde umberinc
0,435 Swi der si ein dinc genant
0,436 Vnd vur eingeschaft irkant
0,437 Dr an sin dri dinc ougende sich
0,438 Di alle sin beczeichenlich
0,439 Der heilegin driualdikeit
0,440 Der sunne mti gescheffe treit
0,441 Gescheffe hicze vnd schin
0,442 Mit den drin wil daz eine sin
0,443 Ein einic dinc daz doch driualt
0,444 Ist des uater hoen gewalt
0,445 In siner gotlichen craft
0,446 Beczeichent der sunnen geschafft
0,447 Wesinde in der gewalde sin
0,448 Den sun bedutet der sunne-schin
0,449 Und sin wunniclicher glast
0,450 Wan im des schines ni gebrast
0,451 Der von der gotheit im schein
0,452 Vnd i wuchs vnd ni verswein
0,453 An im do er durch uns alhi
0,454 An sich di menscheit intphi
0,455 Der sun der ist di gotis wisheit
0,456 Als uns daz buch der wisheit seit
0,457 Durch des wisen salomonis munt
0,458 Di wisheit sprach e uor der stunt
0,459 E di gescheffe keine craft
0,460 Gewunne in rechtir eigenschaft
0,461 Ich was bi gote betrachtende
0,462 Al di gescheffe . vnd achtende
0,463 Wi di gescheffe solde sin
0,464 Geschaffen . vnd ir materie schin
0,465 Mit vorgedehtlichem sinne
0,466 So heizet des vatir minne
0,467 Vnd des suns der heilige geist
0,468 Der mit gute in rechtir volleist
0,469 Einige von in beiden gadt
0,470 Der beczeichenuge hat

0,471 Der hitze di di sunne git
0,472 Mit warheit an der sunnen lit
0,473 Ebinmaze der driualdicheit
0,474 Als di schrift uns hat geseit
0,475 Got was alsus mit namen i
0,476 Als ich uch han bescheiden hi
0,477 Einiger in driualdiger craft
0,478 Vnd allir creaturen geschafft
0,479 Mit im in sinim angesicht
0,480 Geformiret vnd anders nicht
0,481 Rechte als da in blute stat
0,482 Ein dinc daz nicht geschefte hat
0,483 Vn- geschafft nach siner blute nimit
0,484 Di danne der natur geczimit
0,485 Got machte sin hantgetat
0,486 Durch gotlicher gute rat
0,487 Dar uf daz di genade sin
0,488 Wurde siner geschefte schin
0,489 Got was i . vnd lengir wan.i vn- . i
0,490 Wan angenge noch in intphi
0,491 Sin gotheit vnd der gewalt
0,492 Des uatir namen ist geczalt
0,493 Dem sune di gotis wisheit
0,494 Als uns der pphete seit
0,495 Der spricht “herre du hast bereit
0,496 Alle dinc in diner wisheit
0,497 Du eine alle dinc wol weist”
0,498 Di gute ist der heilige geist
0,499 Der allem lebin git daz lebin
0,500 Dem lebin vnd namen ist gegeben
0,501 Mit wiser kunst vnd an virnunst
0,502 Odir mit sinlichir kunst
0,503 DAZ got unser herre crist
0,504 Der mensch durch uns wurde- ist
0,505 Bi der gotheit ie were
0,506 Ie vnd er daz in gebere
0,507 Di mait nach der menscheit
0,508 Daz sal uch hi werden geseit
0,509 Als iz durch der pphetin munt
0,510 Got unser here machit kunt
0,511 Hi uon sprichet ysaias
0,512 Der vol des heiligen geistes was
0,513 Der sprichet “got der herste
0,514 Ich der iungiste vnd der erste
0,515 Min hant di erde gemachet hat
0,516 So hat den himel als er stat
0,517 Gemezze gar min zesewe hant”
0,518 Ouch tut uns dauid irkant

0,519 Got mit sinem worte hat
0,520 Den himel geuestint dar nach stat
0,521 Mit sines mundis geist ir craft
0,522 Gesterkit ist . di beschaft
0,523 Bezeichint di namen dri
0,524 Di gote sin mit namen bi
0,525 Got daz ist got daz wort daz kint .
0,526 Der heilige geist di namen sint
0,527 Dri namen in psonen dr in
0,528 Di dri namen under in
0,529 Sint di dri namen ein einicheit
0,530 Ein ungescheiden underscheit
0,531 Der gotheit als uns uoriach
0,532 Daudid do er uon dem sune sprach
0,533 Zu me vatir hin des suns worth
0,534 Als der sun zum uatir sprichet dort
0,535 “Du bist min sun” sprach czu mir
0,536 Der here “nu ger ich gebe dir
0,537 Czu erbe der erde- endeczil
0,538 Vnd alle di diet want ich wil
0,539 Daz iz dir zu erbe si irkorn
0,540 Ich han dich hute geborn
0,541 Vor lucifern gebar ich dich”
0,542 Sus ma-ge- wis beczeichent sich
0,543 Daz got wart me-sch vn- doch ist got
0,544 Als daz wolde sin gebot
0,545 Ciz ist bewerit also vil
0,546 Vn- also wol daz ich nicht wil
0,547 Noch in sal noch in tar
0,548 Vurbaz di rede berichten gar
0,549 Als ich an den schriften las
0,550 Abir sprichit ysayas
0,551 “Wer mac sin geslechte
0,552 Mit czal vurbringen rechte”
0,553 Der wise iob ouch hi uon seit
0,554 “Wo vindes du gotis wisheit
0,555 Wem ist daz kunt wi adir wo”
0,556 Ouch stet geschriben andirswo
0,557 “Wem ist die wurczel der wisheit
0,558 Vnd der urhab uorgeleit
0,559 Des gewaren gotis suns”
0,560 Sint daz mir der wisheit tuns
0,561 So cleine hat geteilet sich
0,562 So n getar ich nicht gepinen mich
0,563 Daz ich da uon icht mer sage
0,564 E daz ich z doch uollen gedage
0,565 So wil ich sprechin mere
0,566 Nach der schrifte lere

0,567 Di min urkunde hir an ist
0,568 Wi got unser here crist
0,569 Schit uon gote dem uatir sin
0,570 Daz er was selbe sam der schin
0,571 Der von einem lichte gat
0,572 Daz licht den schin doch bi im hat
0,573 Vnd sint ouch beide anders nicht
0,574 Wan vuvrschin vnd daz licht
0,575 Czu glichir wis alsam der munt
0,576 Daz wort mit rede machit kunt
0,577 Vnd als daz hercze bi im treit
0,578 Beslozen di wisheit
0,579 Also quam uon dem uatir daz kint
0,580 Di gewaldes ungescheiden sint
0,581 Vnd in einigir driualdekeit
0,582 Als ich uch nu hi habe geseit
0,583 SO daz ich nicht nu wil gedagin
0,584 Vn- swigi- muz nicht verbaz sagin
0,585 Von den drin benenden gotis
0,586 Mit der helfe sinis gebotis
0,587 Wold ich uon der engele craft
0,588 Vnd uon der himelischen herschaft
0,589 Gerne sprechin nu ne kan
0,590 Ich noch mich s genemin an
0,591 Daz min kunstlosir sin
0,592 Icht czu uil gesagin uon in
0,593 Wan ane gotis wisheit
0,594 Ist allin menschin uorseit
0,595 Wi vnd waz engelisch nature si
0,596 Gote sint di engele bi
0,597 Daz si vur im vur bringin
0,598 Mit dinstlichen dingin
0,599 Gotis dinist vnd sin gebot
0,600 Engele sint di neher got
0,601 Danne ander engele an sehint
0,602 So in di i neher spehint
0,603 So si in i serir minnin
0,604 Vnd in sinir libe brinnin
0,605 Ouch sint engele genant
0,606 Di werdint in di werlt gesant
0,607 Szu sagene daz do sal geschen
0,608 Bi gote sint ouch engele gesen
0,609 Di zeichin vnd manic wundir
0,610 Ofte wirken albesundir
0,611 Nun kore hant der engelschar
0,612 In engelischem orden gar
0,613 Dinen si gote cz allir czit
0,614 Dinistlichen in widirstrit

0,615 Daz engele hoers namen sin
0,616 Dan ander engel daz tut schin
0,617 Di heilige schrift der warheit
0,618 Engel sin dar zu bereit
0,619 Daz si ander engel senden
0,620 Vnd di di botschaft uorenden
0,621 Daz irzeigete wol zacharias
0,622 Der ein heilig pphete was
0,623 Ein engel wart zu im gesant
0,624 Do der was von im gewant
0,625 Ein ander engel im bekam
0,626 Dem must er sin gehorsam
0,627 Er sprach z im louf nicht irwint
0,628 Vn- vndirwise mit rede daz kint
0,629 Sag im heiz iz vurbaz sagin
0,630 Daz her noch in sinen tagin
0,631 Ierusalem gebuwit wirt
0,632 Also daz si mure virbirt
0,633 Der leist iz vnd wart getan
0,634 Do von darf nimant czwiuel han
0,635 Ein engelschar in si merir
0,636 Gewaldegir vnd herir
0,637 Dan ein ander engelschar da bi
0,638 Mit gewaldes creften si
0,639 Man list vil ofte hi vnd da
0,640 Vnd in den schriften anderswa
0,641 Und ist harte uil geschein
0,642 Daz di engel sint geschin
0,643 Zu n heiligen uf di erde kumen
0,644 Des ist mit warheit vil vornume-
0,645 DI also werden hin gesant
0,646 Vnd di amechtis sin irkant
0,647 Di en scheiden so uon gote nicht
0,648 Si en sin vor gotis angesicht
0,649 Vnd sehin in mit vrouden an
0,650 Vnd sie got her wider an
0,651 In wern si nicht in gotis gesicht
0,652 So konden si mit wiczen nicht
0,653 Kumftige dinc der si uiriehint
0,654 So sie gotis tougen sehint
0,655 Sus woni-t sie gotis gnaden samit
0,656 Der engele namen vnd ir amit
0,657 Wil ich mit namen nennen
0,658 Ob ir si welt irkennen
0,659 Virtutes vnd potestates
0,660 Vnd zuhant dominationes
0,661 Do ne ste bi principatus
0,662 Ein engelamit heiczit sus

0,663 Ein andir ist ouch da bi
0,664 Daz ist geheizen troni
0,665 Vn- cherubin vnd seraphin
0,666 Der namen ich sus bewiset bin
0,667 Vnd machit daz latin irkant
0,668 Virtutes sin tugende genant
0,669 Von den di zeichen geschin
0,670 Di got wil di sinen lan sehin
0,671 Vnd potestates heizin di
0,672 Der gewalt mit creften i
0,673 Was andern hoen geisten obe
0,674 Di got lobent mit ir lobe
0,675 Uurbaz bin ich bewiset des
0,676 Daz dominationes
0,677 Sin di herscheffe
0,678 Di mit herlicher crefte
0,679 Vur di gewalt uf stigent
0,680 Gotis lob sie nicht uirswigent
0,681 Sie loben in czu allin cziten
0,682 Sunder alliz vnd erbiten
0,683 Abir dirre name principatus
0,684 In latine sich dutet sus
0,685 Di vurstenameit nennit sie
0,686 Di schrift . nu horit vort wie
0,687 Waz der amechte mer si
0,688 Di da sin geheizen troni
0,689 Daz sint di stule uf di got
0,690 Durch sines gerichtes gebot
0,691 Sin gerichte wil sizzen
0,692 Volleist ob allen wiczen
0,693 Dutet der name cherubin
0,694 Von dem engelamechte seraphin
0,695 Tut di schrift uns cunt
0,696 Si sin di di z allir stunt
0,697 Vor gote allernehest sin
0,698 Vnd sinen gothlichen schin
0,699 Vor n andern allirneste sen
0,700 Vnd im alsulcher libe ien
0,701 Daz sie in sinen minnen
0,702 Sunderlich in minnen brinnen
0,703 Nu wil ich ouch nennin da bi
0,704 Di hoesten erczengel dri
0,705 Michahel vnd gabriel
0,706 Vnd der erczengel raphael
0,707 Vnd sagen zu dute alhi zuhant
0,708 Wi si czu dute sin genant
0,709 Michahel den namen hat
0,710 Der nach sins amechtis orden stat

0,711 Er dutet sich wer als got
0,712 Wan in hat daz gotis gebot
0,713 Czu probste in hoer crefte wis
0,714 Gemachit vbir daz paradis
0,715 Sus ist bedutet michahel
0,716 Di gotis sterk ist gabriel
0,717 Von latine czu dute irkant
0,718 So ist raphahel genant
0,719 Di gotis erczenie
0,720 Di herin engele drie
0,721 Namen nach ir amechte hant
0,722 In den si sich ouch schouwen lant
0,723 Von gewalde michahel
0,724 Von gotes sterke gabriel
0,725 Raphahel von erczenie nimit
0,726 Der reine name im geczimit
0,727 Dise engele wir sus nennin
0,728 Wan wir nicht irkennin
0,729 Insundern namen cheinin me
0,730 Von den ich han gesprochin e
0,731 Daz sin herschefte vnd engelamit
0,732 In den manic tulent . tulent samit
0,733 Engele wonit uor gotis geschicht
0,734 Sus sint iz amit vnd namen nicht
0,735 DO got di engele werden hiz
0,736 Di in den wunsch der schone liz
0,737 In himelischer wunne gar
0,738 Do was ob allir engelschar
0,739 Der schonste engel lucifer
0,740 Den trouk sin tummer wan daz er
0,741 Gote wolde glichen sich
0,742 Mit gewalt vnd ebinrich
0,743 Als des gedacht von im wart
0,744 Do warf in sine hochfart
0,745 Von himel in den hellegrunt
0,746 Mit im viruilen san zu stunt
0,747 Sins willen volgere alle
0,748 Zu dem ewigin totvalle
0,749 Vnd als er e der schonste was
0,750 Ir allir schone ein spigilglas
0,751 Recht als eislich wart er do
0,752 Vnd sine uolger alle also
0,753 Di schrift tut uns uon im kunt
0,754 Daz in sin hochuart eine stunt
0,755 Zu himile nicht bliben liz
0,756 Er daz sin in di helle stiz
0,757 Vnd alle sine mituolgere
0,758 In iomir wernder swere

0,759 Ist im alle gnade da ture
0,760 In dem heiczen helleviure
0,761 So di virvluchten hellekint
0,762 Wonende in der lufte sint
0,763 Si brinnen doch ir wize ist uil
0,764 Si wonen dik vnd manche zil
0,765 In der lufte manche zit
0,766 Durch nicht wan durch den nit
0,767 Daz si hin zu irn arbeiten
0,768 Virraten vnd ouch virleiten
0,769 Der tummen sundere lebin
0,770 Den guten sint si ouch gegeben
0,771 Zu pine durch alsulche site
0,772 Daz ir lebin werde da mite
0,773 Gesterkit vnd ouch uirsuchet
0,774 Ob ir got icht geruchet
0,775 Warumme si nicht quamin wider
0,776 Vnd gehorsam wurden sider
0,777 Daz quam do von ir selbis gedanc
0,778 Der hoen sunden si betwanc
0,779 Vnd sundirn daz in nimant riet
0,780 Da uon sich ouch nimant uz schiet
0,781 Der in des heiles gedechte
0,782 Daz er iz zu hulden brechte
0,783 Der nit daz si uirlorin sint
0,784 Nider allir menschin kint
0,785 Wan uns got hat benennit dar
0,786 Zu der rechten engeleschar
0,787 Da in ir wunne wart benumen
0,788 Vnd von dannen si sint kumen
0,789 Nv wundert uillichte eine- man
0,790 Der iz nicht baz betrachte- kan
0,791 Wi zu den engeln muge kumen
0,792 Bi den sin vroude ist benumen
0,793 Der tuuel der durch hochuart
0,794 Virstozin von himele wart
0,795 Vnd mit in got muge an sehin
0,796 Als vir z buch horen iehin
0,797 Daz von dem reinen iobe seit
0,798 Do spricht di schrift mit warheit
0,799 Daz bi den engeln were satan
0,800 Do daz uirsuchen must irgan
0,801 Daz got an ioben leite
0,802 Mit manchir swerin arbeite
0,803 Sach er do got mit ansicht
0,804 Nein er werliche nein er nicht
0,805 In sehin sin irwelten kint
0,806 Di kein im reinis herczen sint

0,807 Vnd binamen nimar mer
0,808 Er si rich arm odir her
0,809 So sehint di gotis ougen
0,810 Offenlich vnd ouch tougen
0,811 Beide ubele vnd ouch gute
0,812 In herczin vnd in mute
0,813 Got den sach der tuuel nicht
0,814 Der in sach mit der gesicht
0,815 Do er kein gotis vrage sprach
0,816 Vnd sin vrage czucz im geschach
0,817 Von wannen er queme dar
0,818 Ich han vmmeloufen gar
0,819 Den vmmeceiz der erde
0,820 Do irczeichet mit unwerde
0,821 Sin engistliche arbeit
0,822 Di er von gotis czorne leit
0,823 Vn- sach in doch zu rechte nicht
0,824 Mit uollir ougen angesicht
0,825 Nu vraget lichte etiswer
0,826 Antwedir dirre oder der
0,827 Wi got di engele sprechin zu
0,828 Odir wi er sine rede czucz in tu
0,829 Odir der heiligen selen sin
0,830 Czu gote sprechin odir er czu in
0,831 Vnd wi ouch di rede si getan
0,832 Di got mit dem tuuel wil han
0,833 Vnd er hin cz im keine stunt
0,834 Dem wil ich daz machen kunt
0,835 So got czu n engeln sprichit icht
0,836 Zuhant mit sinir angesicht
0,837 Irkennit ir mut sinen sin
0,838 Rechte als er habe gesprochen zu in
0,839 Vnd sinen willen gar geseit
0,840 Mit der gesicht der gotheit
0,841 Kunnen si zuhant lesin
0,842 Waz si werbende suln wesin
0,843 Si sprechin zucz im anders nicht
0,844 Wan mit der vroude der angesicht
0,845 Vnd mit dem lobe daz z allir zit
0,846 Ir orden im zu dinste git
0,847 Nach siner gotheit gebote
0,848 Wi ouch di selen mit gote
0,849 Reden daz wirt uch ouch geseit
0,850 Mit endehaftir warheit
0,851 Als di schrift der buche iehint
0,852 So sie di gotheit an sehint
0,853 Zuhant so sin sie gewert
0,854 Swes ir wille wunschis geret

0,855 Sin antwurt ist daz er tut
0,856 Swes an in gert ir urolich mut
0,857 Wi ouch gotis rede si getan
0,858 Di er mit dem tuuel wil han
0,859 Daz ist der itewiz der missetat
0,860 In dem er gote gesundet hat
0,861 Sin antwurt mac nicht anders sin
0,862 Wan sin arbeitlicher pin
0,863 Den er muz dulden alle stunt
0,864 Vnd daz im daz vil wol ist kunt
0,865 Daz gote nicht vorborgin ist vor
0,866 Er n sehe durch allir herczin tor
0,867 Vnd sehe di dinc e sie geschehin
0,868 Vnd immir werdin angesehin
0,869 HI mac uns wachsin vrage-s vil
0,870 Ein man uillichte vragin wil
0,871 Vnd sprichet lichte wi was got
0,872 So wunderlich daz sin gebot
0,873 Den bosen engel werden hiz
0,874 Daz er in nicht bliben liz
0,875 Vngescheftic . do er in
0,876 Vnrechte wiste vnd sinin sin
0,877 Daz muste irgen durch sulche- rat
0,878 Daz di reine hantgetat
0,879 Gezirde dar mite neme
0,880 So di iene widerczeme
0,881 Wurden vnd hin getan
0,882 Daz di rechten musten han
0,883 Deste richer clarheit
0,884 Mit werndem libe sundir leit
0,885 Ein meler dem gemelde sin
0,886 Gibit deste richeren schin
0,887 Also daz iz schone richet
0,888 Swen er vnderstrichet
0,889 Nach eigenlichem vlize
0,890 Mit swarczer varwe daz wize
0,891 So hat di wize deste me .
0,892 Schone . vn- wirt schoner danne e
0,893 Were niman tumb . wer were wis
0,894 Wer hette dan an witzen pris
0,895 Tet al di werlt des wunschis recht
0,896 Were beide here vnd der knecht
0,897 Algliche wol rechte gemut
0,898 Wer were dan ubel odir gut
0,11521 Mit dem ich wil hebin an
0,11522 Daz ist moyses din dienstman
0,11523 Dem du uil mange stunde
0,11524 Von munde zu munde

0,11525 Dinis gewaldis willekur
0,11526 Nach willin leistis vur
0,11527 Vnd wie din craft ie dinir diet
0,11528 In allin notin wol beriet
0,11529 Als er selbir di warheit
0,11530 Von dinin genaden hat geseit
0,11531 Des wil ich abir beginnin hie
0,11532 Zu tichtene . nu horit wie
0,11533 LAnge nach den ziten sit
0,11534 Ich meine nach iosebis zit
0,11535 Do der starb vn- was geleit
0,11536 Ich uch hie uor han geseit
0,11537 Iz was . vnd wuchs ein kunic do
0,11538 Mit creftin in egypto
0,11539 Der da des landis crone
0,11540 Truc nach dem pharaone
0,11541 Vndir dem der gotis wigant
0,11542 Ioseph . berichte egyptelant
0,11543 Na gen im an der achtin zal
0,11544 Der lande kunige ubiral
0,11545 Als di warheit uns tut gewis
0,11546 Er was genant amolophis
0,11547 Sin zuname was pharao
0,11548 Sus heizin s landis kunige do
0,11549 Swie s ouch andirs heizin da
0,11550 Der selbe kunig was andirswa
0,11551 Mit huse . sus iehin mere
0,11552 Danne iosebis herre were
0,11553 Vnd was hie uon egyptelant
0,11554 In einim nuwen site irkant
0,11555 Wan der kunic irkante nicht
0,11556 Der hoen tat . di hoe geschicht
0,11557 Di ioseph dem lande bot
0,11558 Mit rate in der hungirs not
0,11559 Vnd uirgaz der gutete also gar
0,11560 Daz er ir nam dicheine war
0,11561 Vnd ioch nieman in dem lande
0,11562 An iosebis kunne irkande
0,11563 Wie z lant uon kummir schiet
0,11564 In hungirs not . vnd sie beriet
0,11565 In notdurftigir wise
0,11566 Kornis vnd ouch spise
0,11567 Der kunic was dem kunne gra-
0,11568 Vnd daz lantvolc alsam
0,11569 Di hazten sie z allir zit
0,11570 Durch den haz . vnd den nit
0,11571 Sie haz gein in gewonnen
0,11572 Daz sie sich baz uirsunnen

0,11573 An witzten . waren dan sie
0,11574 Vnd daz in baz zu handen gie
0,11575 Nach wunschlicher lere
0,11576 Mit salden . gut vnde ere
0,11577 Vnde an geslechtis edilcheit
0,11578 Diz was den lantluten leit
0,11579 Vnd hattin z uor ungemach
0,11580 Der kunic do zu sinen sprach
0,11581 “Diz vremde lut gewachsen ist
0,11582 Vnd wechsit sere z allir vrist
0,11583 Vnd blibit iz sus di lenge
0,11584 Daz iz uns ebinstreng
0,11585 Wirt . vnd sterkir dan wir sin
0,11586 Si tunt uns ungenade schin
0,11587 Wirt uns ein not angende
0,11588 Vnd urluge bestende
0,11589 Sie kerint zu der uiende her
0,11590 Vnd helfint in so richer wer
0,11591 Daz sie mit an uns gesigint
0,11592 Als sie uns danne obe ligint
0,11593 So beroubin sie daz lant
0,11594 Vnd uarint hin vri zuhant
0,11595 Nu ratit wie wir daz bewarn
0,11596 Vnd iz wisliche vndirvarn
0,11597 Legin an sie mit clucheit
0,11598 Mit dienste so uil arbeit
0,11599 Dar an in allir craft zurge
0,11600 Vnd ir vorbaz nicht w’de me”
0,11601 Der rat begond in allin
0,11602 Behagin . vn- wol geuallin
0,11603 Ir rat gemeinliche daz riet
0,11604 Daz er di israhelische diet
0,11605 Mit arbeit nider dructe
0,11606 Vnde in da mite vnzucte
0,11607 Wolluste an irme libe
0,11608 So daz bi sinem wibe
0,11609 Ir dichein in lege
0,11610 Vnd kurtzewile phlege
0,11611 Von der starken arbeit
0,11612 Di an sie wurde geleit
0,11613 Mit manigem pinlichem site
0,11614 Vnd daz da wurde irwendit mite
0,11615 Menschliches samen art
0,11616 Daz lut sere gearbeitit wart
0,11617 Sie musten buwen daz lant
0,11618 Erden tragen vnd ouch sant
0,11619 Ziegil brinnin vnd ouch kalc
0,11620 Als ein gekouft eiginschalc

0,11621 Arbeitin sie nacht unde tac
0,11622 Ein meistir der ir phlac
0,11623 Schuf man den gesellescheft zu
0,11624 Ieclichir spate vn- vru
0,11625 Vnd muste daz ir einir wesin
0,11626 Vbir den wart uz gelesin
0,11627 Ein lantman der sin phlac
0,11628 Z allin ziten ob in lac
0,11629 Vnd mit slegin dar zu twanc
0,11630 Duchte ir ruwe zu lanc
0,11631 Daz er sie muste twingen
0,11632 Mit slegin dar zu bringen
0,11633 Daz sie an allir vndirlazen
0,11634 Arbeitin mustin ane mazen
0,11635 Mit sogetanir libis not
0,11636 Man zu buwene in gebot
0,11637 Mit hertin slegin sundir lon
0,11638 Eine stat . di hiz phiton
0,11639 Vnd ramassen ein houbitstat
0,11640 Di uesten wurden wol besat
0,11641 Mit w'licher lute wer
0,11642 Di mit creftilichem her
0,11643 Zu wer dem lande do lagen
0,11644 Vnd uz den uestin phlagen
0,11645 Des landis . do werliche
0,11646 Vnd daz in daz riche
0,11647 Vientliche nimant mochte kume-
0,11648 Swaz in me lande wart genome-
0,11649 Zinses do . die hiez uil gar
0,11650 Des landis kunic vuren dar
0,11651 Da wurden da mit richeit
0,11652 Gar zusamene do geleit
0,11653 Daz sie der kunic solde
0,11654 Da uinden swen ir wolde
0,11655 In notin zu cheinin stunden
0,11656 Di stete do begunden
0,11657 Sere richen von der arbeit
0,11658 Di israhelis kunne nu leit
0,11659 Wan sie dar dienten sere
0,11660 Noch dan si muste- mere
0,11661 Liedin arbeitlichir not
0,11662 Zu vegine man in gebot
0,11663 Der stete wege bi den tagin
0,11664 Vnd daz hor von dannen tragin
0,11665 DEr dritten not wart in irdacht
0,11666 Daz sie wurden uorbracht
0,11667 Mit pine an lebelichir craft
0,11668 Man gebot al der kunneschaft

0,11669 Daz sie sundir lonis gelt
0,11670 Vor den stetin hin daz uelt
0,11671 Durchgrubin allin siten
0,11672 Mit tiefin grabin witen
0,11673 So di wazzir irguzzin
0,11674 Daz sie in di graben wluzzin
0,11675 Vnd danne ein ieclich grabe
0,11676 Di wazzer solde wisen abe
0,11677 Hin dan uon den uestin
0,11678 Swaz di lantlute westin
0,11679 Zurdenkine . daz uant man in
0,11680 Sie zu uirterbine want ir sin
0,11681 Vil ubiles . vnd wirs dan we
0,11682 So wart ir me vnd me
0,11683 So man s ie serir dructe nider
0,11684 So ie serir wuchsen si wider
0,11685 Ir wart ie uil . vnd mer dan vil
0,11686 Sie wuchsen merinde allir zil
0,11687 Waren s . als iz got gebot
0,11688 Mit diecheinir hande not
0,11689 In mochtin di lantlute sie
0,11690 Virtiligien . noch uirtriben nie
0,11691 Sie wuchsin ie dar an irn danc
0,11692 Di groz arbeit was in zu lanc
0,11693 Wan sie werte daz ist war
0,11694 An dem kunne uir hundirt iar
0,11695 DO dem kunige wart geseit
0,11696 Vnd er beuant mit warheit
0,11697 Daz diz alliz nicht uirvi
0,11698 Sin ark wille in do nicht irlie
0,11699 Er dachte vnd wie daz tochte
0,11700 Daz er uirterbin mochte
0,11701 Den reinin israhelischen diet
0,11702 Zwein wisen wiben er riet
0,11703 Der selbin hiez eine phua
0,11704 Vnd di andere sephora
0,11705 Di sulcher kunste phlagen
0,11706 Swanne di vrouwen gelagen
0,11707 Vnd kint gebern solden
0,11708 Daz sie di haben wolden
0,11709 Als ie kindir soldin gebern
0,11710 An di begonde der kunic gern
0,11711 Daz sie deste ofter werin
0,11712 Da di iudische wip geberin
0,11713 Vnd als ein sun wurde geboren
0,11714 Daz der san wurde uirlorn
0,11715 E di geburt solde geschen
0,11716 Vnd daz sie danne wolden ien

0,11717 Daz sie den sun sterbitin tot
0,11718 Da bi er mit gebote gebot
0,11719 Daz sie der sinne wieldin
0,11720 Di meidelin behieldin
0,11721 Lebinde . vnde unuirtterbit
0,11722 An me libe vn- vnuirsterbit
0,11723 Alhier umbe geheiz er in
0,11724 Mite vil . vnd grozin gewin
0,11725 Vvar umbe der kunic tete daz
0,11726 Daz her sie immir mit vorchte intsaz
0,11727 Wan im hatte e mit warheit
0,11728 Ein sin wissage geseit
0,11729 Daz daz selbe kunne
0,11730 Uil kurzelicke gewunne
0,11731 Ein kint daz mit gewaldis hant
0,11732 Solde alliz egyptelant
0,11733 Drucken . vnde demuten
0,11734 Vnd daz wold er also behuten
0,11735 Daz iz nimmir geschehe
0,11736 Vnd was di rede uil smehe
0,11737 Vnd uirtterbite sie durch daz
0,11738 Wan er di vorchte sere intsaz
0,11739 Daz er di meide behalden hiez
0,11740 Vnd in vride bern liez
0,11741 Daz geschach durch den list
0,11742 Sa sie nach rechtis aldir vrist
0,11743 Dar nach zu ir tagin quemin
0,11744 Daz sie dan di sinen nemin
0,11745 Vnd sie zu wiben hettin
0,11746 Vnd ir mutwillen tetin
0,11747 An in . swie sie duchte gut
0,11748 Als iz gerte ir gernde mut
0,11749 Durch daz beuridet er irn lip
0,11750 Vnde wiste wol daz di wip
0,11751 Waren unwerliche irkant
0,11752 Vnd blode mit w'lichir hant
0,11753 Di wip do des nicht woldin
0,11754 Tun . di iz behutin soldin
0,11755 Ich meine di des gebetin sint
0,11756 Daz sie da irtotin di kint
0,11757 Vnd taten s nicht sie vorchtin got
0,11758 Als in des kuniges gebot gebot
0,11759 Vnd liezin di kint lebin durch in
0,11760 Des vuget in got den gewin
0,11761 Daz sie in kurzen stunden
0,11762 Sere richin begunden
0,11763 An gute mit grozir habe
0,11764 In was da uor genomen abe

0,11765 Daz heil daz sie in ir iaren
0,11766 An vrucht vnd unberhaft ware-
0,11767 Vnd nie kint gewonnen
0,11768 Do begond in got gunnen
0,11769 Daz sie uon sinir genaden craft
0,11770 Mit kinden wurden berhaft
0,11771 Daz wart in zu lone uirlan
0,11772 Nu wart dem kunige kunt geta-
0,11773 Daz sie sinis gebotis leisten nicht
0,11774 Der straffe s umbe di geschicht
0,11775 Daz sie nicht taten sin gebot
0,11776 Sie sprachin in ir vorchten not
0,11777 “Ebreisch wip uil kunstic sint
0,11778 So sie gebern suln ir kint
0,11779 Sie uirbergin z uns uor uil gar
0,11780 E daz wir mugen kumin dar
0,11781 So hat iz ende genumen
0,11782 Vnd ir geburt ist uolkumen”
0,11783 DO der kunic innen wart
0,11784 Daz sich mit listlichir art
0,11785 Sin wille als er da wolde
0,11786 Do n mochte noch endin solde
0,11787 Als daz got selbe irwante
0,11788 Mit gebote er do sante
0,11789 Vnd gebot in dem lande sa
0,11790 Vnd hiez gebitin den sinen da
0,11791 Vil offenliche vnd an den lip
0,11792 Swa ein ebreisch wip
0,11793 Einin sun gebere . daz man in
0,11794 Vurte in ein wazzir hin
0,11795 Vnd in zu hant irtrencte
0,11796 Vnd man in nicht uirhencte
0,11797 Daz sie icht vurbaz kemen
0,11798 Dem lande sin erbe benemen
0,11799 Sus was der kinde in kurtziem zil
0,11800 Irtotit vnd irtrenkit uil
0,11801 In allem egyptenlande
0,11802 Dar umbe in got sande
0,11803 Des ungeloubin irrecheit
0,11804 Daz sie als uns di warheit seit
0,11805 Betin durch des tuvels spot
0,11806 An . einin stier als einin got
0,11807 Den sach man uz einim wazzir gan
0,11808 Glich einim stiere getan
0,11809 Ein wizzir zeichin er truc
0,11810 Einsit ubir den zeswin buc
0,11811 Gestalt als der mane
0,11812 Nach tumbes h’zin wane

0,11813 Wart er uor got gebetit an
0,11814 Vnd als in wip vnd man
0,11815 An gebetitin san er virswant
0,11816 Der got was apis genant
0,11817 Mit dirre hoen schulde
0,11818 Virworchtin sie gotishulde
0,11819 Vnd rach ouch got den unsin
0,11820 Mit dirre missetat an in
0,11821 DO des ubelis uil geschach
0,11822 Vn- e man uil kinde irtrenkit sach
0,11823 Der israhelin herze leit
0,11824 Wuchs . vnd wart uon clage breit
0,11825 In den selbin geziten
0,11826 Was undir den leuiten
0,11827 Ein gut man hiez amram
0,11828 Der ouch uon sime kunne nam
0,11829 Ein wip was iacobeche genant
0,11830 Do der di gebot iruant
0,11831 Er dachte in grozir swere
0,11832 Daz er vil gernir were
0,11833 Ane kint als uil lute sint
0,11834 Dan ob von im ein liebiz kint
0,11835 Wurde im zu vroudin irkorn
0,11836 Daz er daz muste han uirlorn
0,11837 Vnd in wolde durch di geschicht
0,11838 Bi sinem wibe ligen nicht
0,11839 Vnde als des sin h'ze wart inein
0,11840 Got im in me troume irschein
0,11841 Vnd hiez in sundir zwiuels wan
0,11842 Di vorchte uz sime herzin lan
0,11843 Ein kint wurde im zu kinde irkant
0,11844 Gein dem egypte daz lant
0,11845 So groze vorchte solde han
0,11846 Im wart von gote ouch kunt geta-
0,11847 Daz von im wurde ein sun geboren
0,11848 Der z einim ewarten irkorn
0,11849 Wurde . nach der gotis e
0,11850 Daz was aaron . got hiez in me
0,11851 Durch sulcher vorchte geschicht
0,11852 Sin wip langir miden nicht
0,11853 Amram do nicht langir lie
0,11854 Von der slafstat er gie
0,11855 Vnd lac bi sinem wibe
0,11856 Di san uon sinem libe
0,11857 Gewonliche nach rechtir art
0,11858 Einis kindis swangir wart
0,11859 Vnd truk daz biz daz sie iz gebar
0,11860 Daz is nieman wart gewar

0,11861 Diz was wol gotis wille
0,11862 Sie gebar iz also stille
0,11863 Daz iz lutzil iman bevant
0,11864 Do der mutir wart irkant
0,11865 Sin uil wunnlichir lip
0,11866 Wan schonir kint gebar nie wip
0,11867 Do bi der selbin iare zit
0,11868 Als uns di schrift urkunde git
0,11869 Ir herze uil vorchten dolde
0,11870 Daz sie iz uirlisen solde
0,11871 Sie barc iz sere vnd sere
0,11872 Nach der truwen lere
0,11873 Mit mutirliche liebe rat
0,11874 Gein irme liebin kinde hat
0,11875 Dri manede behielt sie z do
0,11876 Daz iz nieman weste also
0,11877 Noch w'lichin irvant
0,11878 Nu tet iz vil ofte irkant
0,11879 Sine kintliche site
0,11880 Hie melt iz sich selbe mite
0,11881 Vnd weinte alse kleine kint
0,11882 Di in ir ersten tagen sint
0,11883 DO diz alliz sus geschach
0,11884 Vn- di mutir rechte irsach
0,11885 Daz ir nicht mer in tochte
0,11886 Daz sie z noch behalden mochte
0,11887 Ir liebiz kint uon kindis siten
0,11888 Di iz begienc unuirmiten
0,11889 Mit listlichen sachen
0,11890 Liez sie ein korbil mache-
0,11891 Lanc lecht mit cleinin gertin
0,11892 Vil slechtin vnd ouch hertin
0,11893 Daz hiez sie vlizlichen
0,11894 Virbichin vnd uirstrichen
0,11895 Beide uzen vnd innen
0,11896 An allin wazzirrinnen
0,11897 Mit hartze vnd cleibin also wol
0,11898 Ob ich so sprechin muz vn- sol
0,11899 Daz nimmir wazzir dr uz oder dr i-
0,11900 Mochte kumin . do leit sie z in
0,11901 Ir liebiz kint vnd truc iz dan
0,11902 In einin bach . der da ran
0,11903 Hin vor des kunigis palas
0,11904 Der bach in stillem runse was
0,11905 Noch zu tief noch zu groz
0,11906 In semftem vluzze iz vloz
0,11907 Unde truk daz kint schone imbor
0,11908 Nu hatte iacobeche da uor

0,11909 Ir tochtir mit dem kinde gesant
0,11910 Di was maria genant
0,11911 Daz sie uil ebene besehe
0,11912 Waz dem kinde geschehe
0,11913 Doch mit so wisen sinnen
0,11914 Daz is nieman wart innen
0,11915 Sus quam iz gerunnen
0,11916 Als im got wolde gunnen
0,11917 Gein des kuniges palas
0,11918 pharaonis tochtir di was
0,11919 Ein vrouwe . vnd hiez termut
0,11920 Kumen . als ofte ein vrouwe tut
0,11921 Durch kurzewile zu dem bach
0,11922 Als sie z kint zu vlizen sach
0,11923 Sie bat iz langen dar
0,11924 Vnd brach daz korbil . sie nam war
0,11925 Des schonisten kindes als ma- iach
0,11926 Daz ie ouge da uor gesach
0,11927 Sie zarte im uil sere
0,11928 Nach wiplichir lere
0,11929 Sie irbarmite sin lip
0,11930 “Werliche .” sprach daz edele wip
0,11931 “Diz ist der ebreischin kint
0,11932 Di so sere uirteilit sint
0,11933 Ich wil iz z eime kinde han
0,11934 Vnd uon mir nimmir lan
0,11935 Zu wunsche in minem mute”
0,11936 Got vugete im wol zu gute
0,11937 Schone . wunsch ere . und daz heil
0,11938 Daz di viende waren geil
0,11939 An zu sehene sinen lip
0,11940 Im bot uil manic lantwip
0,11941 Ir bruste zu sugene dar
0,11942 Der nam iz dicheine war
0,11943 Wan als im vremede brust irkant
0,11944 Wart . dannen wante iz sich zuha-t
0,11945 Vnd liez sich s nicht gezemin
0,11946 Daz iz ir cheine wolde nemin
0,11947 DEs nam sie besundir
0,11948 Alle michil wundir
0,11949 Swer daz wundir sach
0,11950 Maria sin swestir do sprach
0,11951 Zu r kunigin . “vrouwe min
0,11952 Waz ob diz kindelin
0,11953 Vremde bruste nicht sugin wil
0,11954 Ebreischir wibe ist hie vil
0,11955 Wilt u daz ich der eine dir
0,11956 Dem kinde her bringe mit mir”

0,11957 Di kunigin sprach "ia"
0,11958 Do gienc sie nach ir mutir sa
0,11959 Vnd sait ir dise rede do
0,11960 Des wart irs herzin mut vro
0,11961 Daz sie uon leidigem herzin
0,11962 Liez allir leidis smerzin
0,11963 Do sie di warheit uirnam
0,11964 Zu der kunigin sie balde kam
0,11965 Di bot ir sa daz kindelin
0,11966 Als iz intphienc di mutir sin
0,11967 Ez souc uil gutliche
0,11968 Termut di edele riche
0,11969 Beual ir z kint daz sie z zuge
0,11970 Sint iz ir brust so gerne suge
0,11971 Vnd iz ir danne gebe widir
0,11972 Daz geschach mit vrouden sidir
0,11973 Do daz kint was wol irzogin
0,11974 Getruwelich . vnd unbetrogin
0,11975 Als iz zoch di mutir sin
0,11976 Sie bracht iz der kunigin
0,11977 Die iz zu wunschilkinde nam
0,11978 Do iz wider zuz ir kam
0,11979 DIz was in den iaren
0,11980 Do uon adame waren
0,11981 Biz an di stunde uir war
0,11982 Dri tulent vnd hundert iar
0,11983 Vnd acht vnd zwenzic als di zal
0,11984 Sich bezaltin gar vnd ubiral
0,11985 Vnd als di schrift di zal behielt
0,11986 In assiria der cronin wiert
0,11987 Safrus . ein kunic sere wis
0,11988 Vnd in sicionie ortopolis
0,11989 Truc der landis crone do
0,11990 Vnd diz geschen was also
0,11991 Vnd ermes egyptius
0,11992 Athlantis . sun mercurius
0,11993 Philosophie den vrhab
0,11994 Von erste mit hoer kunste gab
0,11995 Von cesarie eusebius
0,11996 Sait . vnd schribit uns alsus
0,11997 Do uon iosebis iare
0,11998 Siebin kunige gewesin waren
0,11999 Biz an di zit in egypto
0,12000 Er schribit ir namen . ir iar also
0,12001 Amors . der was richtene uir war
0,12002 In egypte vumf vn- vumfzic iar
0,12003 Drizehin iar ouch gebot
0,12004 In egyptelande nemrot

0,12005 Vnd ein vn- zwenzic vil gewis
0,12006 Ein kunig hiez amenosis
0,12007 Menfres zwelf iar da crone truc
0,12008 Einis kunigis er da nach gewuc
0,12009 Der was geheizin melfar
0,12010 Der truc sechs vn- zwenzic iar
0,12011 Crone in dem lande da
0,12012 Nach des selbin geziten sa
0,12013 Truc sie mit creftin uir war
0,12014 Vnd kuniclichen sidir nun iar
0,12015 Der kunic thericioniosis
0,12016 Vnd nach dem was amolophis
0,12017 Kunic ein vn- drizic iar
0,12018 Ob uns di schrift sait war
0,12019 Dirre selbe kunic truc
0,12020 Di crone als ich e gewuc
0,12021 Vnd hatte s in den selbin tagin
0,12022 Mit craft zwenzic iar getragin
0,12023 Do diz kint wart geboren
0,12024 Daz sint zu voite wart irkorn
0,12025 Vbir di gotis irwelte diet
0,12026 Als mich di warheit beschiet
0,12027 Di sul wir abir vahin an
0,12028 Dise rede mit merin lan
0,12029 Diz kint wart moyses genant
0,12030 Daz man in dem namen va-t
0,12031 Daz geschach mit bezezeichenu-ge
0,12032 Egyptische zunge
0,12033 Daz wazzir nennit moys
0,12034 Nach der bedutunge wis
0,12035 Daz er was von me wazzir genum-
0,12036 Must im dirre name kumen
0,12037 Als im der site gedachte
0,12038 Sin wunschmutir in brachte
0,12039 Einis tagis mit vrouden schone
0,12040 Irm uatir pharaone
0,12041 Daz got so hoe clarheit
0,12042 Hatte an sinen lip geleit
0,12043 Nach des wunschis lere
0,12044 Den kunic wundirte sere
0,12045 Daz immir irdisch wip
0,12046 Gebern solde so schonen lip
0,12047 Als gar der wunsch an im lac
0,12048 Der sin mit menschen schone phlac
0,12049 Mit uil wunschlichem lone
0,12050 Der kunic nam sine crone
0,12051 Di was uon golde wol irhabin
0,12052 Hammonis bilde dr an irgrabin

0,12053 Einis valschin gotis den daz lant
0,12054 Hatte uor einin got irkant
0,12055 Vnd sazt im uffi z houbit di
0,12056 Daz kint di crone balde vi
0,12057 Vnd warf sie mit unwerde
0,12058 Von im uf di erde
0,12059 Daz sie uiel vnd gar zubrach
0,12060 Daz iz der kunic ane sach
0,12061 Ein valschir ewart der abgote
0,12062 Der nach des tvuels gebote
0,12063 Ir dienst ubete . der stunt da
0,12064 Vnd sprach zu me kunige sa
0,12065 “Werlich herre diz ist diz kint
0,12066 Von deme di mere geschriben sint
0,12067 Daz iz uirterbin sol din lant”
0,12068 Dar nahir trat er zuhant
0,12069 Vnd wold iz irtotit han
0,12070 Diz must er kunic vndirstan
0,12071 Vnd ein andir wise man
0,12072 Der iz schirmen ouch began
0,12073 Iz were uon kintheit geschihin
0,12074 Des wold er vor z kint iehen
0,12075 Vnd uon tumbis kindis siten
0,12076 Were dr an allir valsch uirmiten
0,12077 Vnd allir kintheite haz
0,12078 Diz wolden sie uirsuchen baz
0,12079 Vnd gabin im in di hant
0,12080 Einin gluendin brant
0,12081 Daz man di warheit vunde
0,12082 But ez den zu me munde
0,12083 So mocht iz vnschuldic sin
0,12084 Do tet daz reine kindelin
0,12085 Kintliche sin kintheit kunt
0,12086 Iz stiez den brant in den munt
0,12087 Vnd brante siner zungen ort
0,12088 So daz iz lispende vort
0,12089 Sint alle sine zit sprach
0,12090 Do man di kintheit an im sach
0,12091 Do wart iz vnschuldic geseit
0,12092 Durch der zungen irretheit
0,12093 Lispent im zu libe doch
0,12094 Alle iude- mit rede noch
0,12095 Nu was daz kint so schone gar
0,12096 Vn- so wunneclich uir war
0,12097 Daz nieman was als vngut
0,12098 Als ernsthaft . an siten gemut
0,12099 Daz er z gesen mochte genuc
0,12100 Swa man z durch di stat truc

0,12101 Dar liefin di man vnd di wip
0,12102 Daz sie gesehin sinen schone- lip
0,12103 Di hantwerk gar gelagin
0,12104 Wan alle di ir phlagin
0,12105 Die liezin sie bliben gar
0,12106 Vnd taten des kindes war
0,12107 Dar liefin s an der zit
0,12108 Gemeinliche in widerstrit
0,12109 Daz sie beschouweten daz kint
0,12110 Nu di iar virendit sint
0,12111 Nach sinir kintheit der iugent
0,12112 Mit wisheit . mit mannis tugent
0,12113 Mit zuchten . mit hoe gemute
0,12114 Mit schonir manlicher gute
0,12115 Begreif er der saldenriche
0,12116 Daz zil uil salicliche
0,12117 Do er was kumen zu sinen tagin
0,12118 Vnd er mit creftin mochte tragin
0,12119 Swert vnd manliche wer
0,12120 Er was gein vientlichem her
0,12121 Mit sinne . mit mannis craft
0,12122 Kune wise vnd ellinthaft
0,12123 In alle wis gar vollinkumen
0,12124 Hier an was er uz genumen
0,12125 Daz man im gar des bestin iach
0,12126 Swa man von mannis lobe sprach
0,12127 IN disen selbin ziten
0,12128 Sach man mit creftin riten
0,12129 Di moren in egyptelant
0,12130 Sie wustin mit gewaldis hant
0,12131 An allis widersaztis wer
0,12132 Von menphin biz an daz mer
0,12133 Daz lantlut als ich do las
0,12134 Daz lant als iz gelegin was
0,12135 Di wer di sie mochtin han
0,12136 Mit den sie woldin widirstan
0,12137 Den moren . di sie an riten
0,12138 Sie quamen mit gemeinim siten
0,12139 Uor irn got . vnd baten
0,12140 Daz er in wolde raten
0,12141 Wie sie gein der viende her
0,12142 Sich bereittin wol zu wer
0,12143 Do wart in da uor geleit
0,12144 Vnd uon ir gotin daz geseit
0,12145 Nach ir warheit ungelogin
0,12146 Sie soldin nemin zu herzogin
0,12147 Einin ebreischen degin
0,12148 Daz er ir hers solde phlegin

0,12149 Vnd er were moyses genant
0,12150 Do gienc daz lut alzuhant
0,12151 Vor des kuniges tochtir hin
0,12152 Vnd batin uil sere vmbe in
0,12153 Daz sie in mit in sande
0,12154 Zu helfe . vnd wer dem lande
0,12155 Wan sin werliche hant
0,12156 Bevriden muste nu daz lant
0,12157 Als in irre gote warheit
0,12158 Hette gekundet vnd geseit
0,12159 Di vrouwe iz sere uirsprach
0,12160 Wan sie sich mit vorchti- uirsach
0,12161 Daz sie in uirterbitin uf der vart
0,12162 Mit eiden do uirsichirt wart
0,12163 Vnd mit gewissir warheit
0,12164 Daz si im nimmir chein leit
0,12165 Noch ungemach getetin
0,12166 Vnd in zu herrin hetin
0,12167 Nach sins selbis lere
0,12168 Do sumete sich nicht mere
0,12169 Termut . sie liez den man
0,12170 Mit den lantluten uaren uon dan
0,12171 Di namen in zu herrin do
0,12172 Nu diz geschen was also
0,12173 Daz sie waren in sinir phlege
0,12174 Er liez der wazzir vmbewege
0,12175 Vnd vurte sie nach wisir art
0,12176 Ein gar nahin durchuart
0,12177 Daz sie di moren vorquamen
0,12178 E daz si ir kunst uirnamen
0,12179 Vnd in danne intwichin
0,12180 Einin wec sie do strichin
0,12181 Der durch ein wusten gie
0,12182 In der selbin wusten hie
0,12183 Schedeliche wurme lagin
0,12184 Di der strazen also phlagin
0,12185 Daz nieman dar durch mochte kumen
0,12186 Nu hatte moyses genumen
0,12187 Storke di in den iaren
0,12188 Alda gezemit waren
0,12189 Mit den daz her uf der vart
0,12190 Beuridet uon den slangen wart
0,12191 Nu quam an der moren her
0,12192 Moyses mit sulchir wer
0,12193 Daz in uirmeit ir strit
0,12194 Vnd kertin an der selbin zit
0,12195 Sundir wer mit vluchte sa
0,12196 In s kunigis ueste uon saba

0,12197 Ich meine in sin houbitstat
0,12198 Di was mit richir wer besat
0,12199 Sie nante der kunic kambises
0,12200 Sint nach den ziten meroes
0,12201 Vnd was so wol zu wer gestalt
0,12202 Daz sie nie mannis gewalt
0,12203 Mochte an den geziten
0,12204 Irsturmen odir irstriten
0,12205 Dar inne liez der more her
0,12206 Sich besizen mit richer wer
0,12207 Di sie hatten allirtegelich
0,12208 Her uz mit craft sie w'tin sich
0,12209 So werlich . daz in nieman
0,12210 Di stat mochte gewinnen an
0,12211 E von geschichte daz geschach
0,12212 Daz des kuniges tochtir sach
0,12213 Moyses schonin lip
0,12214 In began daz iunge wip
0,12215 In senedis herzin sinnen
0,12216 So h'zeliche minnen
0,12217 Daz sie sich kurzlich bewac
0,12218 Al der vrouden der sie phlac
0,12219 Odir er wurde ir zu man
0,12220 Sie trug iz mit botin an
0,12221 Wolde in des gein ir gezemin
0,12222 Daz er sie zu wibe wolde nemin
0,12223 Sie wolde im gebin di stat
0,12224 Des sie gerte unde bat
0,12225 Also wart in kurzin tragin
0,12226 Vndir in ubir ein getragin
0,12227 Sie gab im vnd sinem her
0,12228 Stat vnd lute sundir wer
0,12229 Und er nam sie zu wibe sa
0,12230 Waz er den lute tete da
0,12231 Ob er s irsluge odir andirs icht
0,12232 Tete . des seit di schrift nicht
0,12233 Doch wart mir so uil irkant
0,12234 Der mere er betwanc daz lant
0,12235 Do er sich an den moren rach
0,12236 Di morin man in nemen sach
0,12237 Zu wibe als er ir gehiez
0,12238 Di im sich vnd di ueste liez
0,12239 Tarbas was di vrouwe genant
0,12240 Daz sie im zu wibe was irkant
0,12241 Vnd ir minne was sin lon
0,12242 Des zurnete sere aaron
0,12243 Vnd maria di swestir sin
0,12244 Di tet im so vil zornis schin

0,12245 Daz iz got sidir an in rach
0,12246 Wie di rache an in geschach
0,12247 Daz wirt uch her nach gesait
0,12248 Do moyses do was getait
0,12249 So langir wolde in der stat
0,12250 Sin wip er mit im kerin bat
0,12251 Von dan in egyptelant
0,12252 Di widirredit iz zuhant
0,12253 Vnd in wolde mit dem wisen man
0,12254 Nicht zu lande kerin dan
0,12255 Vnd in woldin ouch uon ir nicht da-
0,12256 Er muste al da mit ir bestan
0,12257 Nu tet der edile degin gut
0,12258 Als manic man nach g'ne tut
0,12259 Der mit willen alle vrist
0,12260 Gerne bi den vrunden ist
0,12261 Danne in ellende andirswa
0,12262 In sinen sinnen dacht er sa
0,12263 Wie im der list gezeme
0,12264 Daz er uon dannen keme
0,12265 Mit sulchir vuge daz sin wip
0,12266 Der er was liebir danne ir lip
0,12267 Nicht beswerit wurde
0,12268 Mit swerir iamers burde
0,12269 Den sie nach im truge
0,12270 So man ir sin gewuge
0,12271 Diz was in sinir trachte
0,12272 Von kunste mangir achte
0,12273 Vnd listlichir wunder
0,12274 Von astronomie kunder
0,12275 Daz liez er kiesin do dar an
0,12276 Der edile kunste riche man
0,12277 Machite in zwei vingerlin
0,12278 Zwei cleine bilde guldin
0,12279 Di waren wunderlic gnuc
0,12280 Swer daz eine bi im truc
0,12281 Der uirgaz in sinem mute
0,12282 Swaz im ie zu gute
0,12283 Odir zu leide geschach
0,12284 Swen man daz andir tragin sach
0,12285 Den mut sin herze sa gewie
0,12286 Swaz im was geschen ie
0,12287 Also daz er der geschicht
0,12288 In mochte uirgezzin nicht
0,12289 Daz uirgezzine vingerlin
0,12290 Liez moyses der morin
0,12291 Do uirgaz sie sin so gar
0,12292 Daz sie nam di cheine war

0,12293 Ob sie sin ie kunde gewan
0,12294 Der edile reine wise man
0,12295 Kerte wider heim zuhant
0,12296 Vnd vur gein egyptelant
0,12297 Do er uon kinde was irzogin
0,12298 Der werde an saldin umbetrogin
0,12299 Gein iessen do kerte
0,12300 Als in di libe lerte
0,12301 Di er sime kunne truc
0,12302 Da sach er iamirs genuc
0,12303 Vnd note an sinem magin da
0,12304 Vnd in dem lande andirswa
0,12305 Wan sie mit dienstlichen siten
0,12306 Mange hoe swere liten
0,12307 Von dienstlicher arbeit
0,12308 Di sie da wart angeleit
0,12309 Als ich uch uor uiriach
0,12310 Moyses der gute sach
0,12311 Daz ein lantman da sluc
0,12312 Vngezogenlichin genuc
0,12313 Einin sinir mage da
0,12314 An den selbin kert er sa
0,12315 Vnd sluc in tot zuhant
0,12316 Vnd barc in under den sant
0,12317 Daz man innen wurde nicht
0,12318 Von im der selbin geschicht
0,12319 Uru a me andirn tage
0,12320 Gienc er nach der warheit sage
0,12321 Zu me werke hin . da vand er
0,12322 Zwene ebreische di mit einandir
0,12323 Kriegin . i ne wez vmbe waz
0,12324 In beiden w't er daz
0,12325 Vnd strafte ienin genuc
0,12326 Der di schult an im truc
0,12327 Dem was iz zorn vn- vngemach
0,12328 Der selbe zornlich do sprach
0,12329 "Wer hat dir gewalt gegeben
0,12330 Daz du berichtet unsir lebin
0,12331 Wes vndirwins tu dich
0,12332 Ich wene du woldis slan mich
0,12333 Als du ouch gestirn sluge
0,12334 Vnd in den sant uirtruge
0,12335 Von hinnen einin lantman"
0,12336 Moysen sere wundern began
0,12337 Wer di uirholnin warheit
0,12338 So rechte im hette geseit
0,12339 Vnd iz doch heimelich geschach
0,12340 Im was leit daz ienir sprach

0,12341 Gein im so baltliche daz wort
0,12342 Wan iz uor dem kunige dort
0,12343 Was vil kurtzliche gesait
0,12344 Er hiez dem degine vnuirzait
0,12345 Zuhant mit suche nach iagin
0,12346 Vnd wold in han lazin irslagin
0,12347 Vnd daz der reine wise man
0,12348 Von dem lande san untran
0,12349 DO der gotis wigant
0,12350 Gerumit hette egyptelant
0,12351 Er quam als ich gelesin han
0,12352 Durch eine wuste in madian
0,12353 Diz was ein riche houbitstat
0,12354 Sie hate an z rote mer gesat
0,12355 Mit buwe da uor madian
0,12356 Den ich ouch genennit han
0,12357 Wan abraham von cetura
0,12358 In gebar . der buwete alda
0,12359 Di stat in dem lande
0,12360 Di er nach im selbin nande
0,12361 Als ir sin name wol gezam
0,12362 Moyses gegangen quam
0,12363 Z einim brunnen vor der stat
0,12364 Durch ru er da nahir trat
0,12365 Vnd wolde da di rue han
0,12366 Nu was gesezzin in madian
0,12367 Ein ediler ewarte do
0,12368 Der was geheizin ietro
0,12369 Sibene tochtir hatte der
0,12370 Di quamen gegangen her
0,12371 Nach ir site . vnde woldin
0,12372 Trenken als ie soldin
0,12373 Ir vie . daz was ir site do
0,12374 Nu sie stunden also
0,12375 Bi dem brunnen . da kamen
0,12376 Starke hirten . vnd namen
0,12377 Den iuncvrouwen den brunnin
0,12378 Den sie alda gewunnin
0,12379 Vnd woldin ir vie trenkin e
0,12380 Diz tet den iuncvrouwen we
0,12381 Biz moyses der gute
0,12382 Gewaldis sie behute
0,12383 Vnd half in wol zu rechte
0,12384 Hin abe sluc er di knechte
0,12385 Di in kamin dar na nie
0,12386 E daz di meide getrencten hie
0,12387 Di meide widir kertin
0,12388 Mit dankene sie in ertin

0,12389 Zu m vatir wart groz ir bete
0,12390 Wan er in diz zu erin tete
0,12391 Daz den vremiden w'din man
0,12392 Der sie di ere hette geleit an
0,12393 Vnd schirmete . do er in sach
0,12394 Er da-cte m . do daz geschach
0,12395 Er vurt in mit im heim
0,12396 Vnd wart des mit im inein
0,12397 Daz im der wille gezeme
0,12398 Daz er sinir tochte' neme
0,12399 Eine di hiez sephora
0,12400 Di nam er zu wibe sa
0,12401 Einin sun si sint gewan
0,12402 Dem edilin gotis dinistman
0,12403 Der selbe wart gerson genant
0,12404 Dar nach abir sint zuhant
0,12405 Gewan sie sinis h'zin ger
0,12406 Einin sun hiz eligezer
0,12407 Gotis helfe dutit der name
0,12408 Gutliche vnd an alle schame
0,12409 Liez im si- swer ietro
0,12410 Gewalt ubir al sin vie do
0,12411 Daz was di groste richteit
0,12412 Di do iman was bereit
0,12413 Wan hin vnd her waren di lant
0,12414 In ganzim buwe nicht irkant
0,12415 Da uon was vie di richiste habe
0,12416 Do sich beiaite ieman abe
0,23421 Starke rechlin sine andin
0,23422 An sinen . vnd ir viendin
0,23423 So daz man kint . noch wip
0,23424 Behielde lebin . gut vnd lip
0,23425 Namen sie in allen sa
0,23426 Von in wart ouch lebna
0,23427 Vnd lachis zwo stete zubrochin
0,23428 Diz waren als ich han gesprochi-
0,23429 Alliz houbitstete . vnd eglon
0,23430 Vnd dar zu dabyr vnd ebron
0,23431 Di in der zite iaren
0,23432 Groz . vnd uil mechtic waren
0,23433 In den landen chanaan
0,23434 Nu diz alliz sus was irgan
0,23435 Daz her kerte dannen sa
0,23436 Mit iosue hin in galgala
0,23437 Da sie mit vreuden lagen
0,23438 Vnd nidirlazis da phlagin
0,23439 Bi der gotis heilicheit
0,23440 Als ich da uor han geseit

0,23441 Als do von asor der kunic iabin
0,23442 Vriesch dise mere uon in
0,23443 Er intsaz der hoen seldin teil
0,23444 Vnd daz uobirweginde heil
0,23445 Wan mit sulchir manheit
0,23446 Daz gotis her sige irstreit
0,23447 An vumf kunige her
0,23448 Vn- an achte steten . vn- an wer
0,23449 Di sie in kurzin stundin
0,23450 Hatten sus uirwundin
0,23451 Nach helfe er sich besande
0,23452 Von landen zu lande
0,23453 Swaz im der was gelegin
0,23454 Dannen gewan der degin
0,23455 Gekronter kunige groze
0,23456 Vier vnd zweinzic sinir genoze
0,23457 Di im brachten mit craft
0,23458 Von der heidinschaft
0,23459 Vreidigir helde ein her
0,23460 Dri hundirt tusint zu wer
0,23461 Di alle hatten wapen an
0,23462 Vnd vurten mit in dan
0,23463 Dri tusint herwagene
0,23464 Mit isene wol beslagene
0,23465 Di ir bereitschaft trugin
0,23466 Bi einim wazzere sie uf slugin
0,23467 Daz was geheizin meroy
0,23468 Dem lugin s mit creftin bi
0,23469 Vnd dachtin daz gotis her
0,23470 Virterbin sundir wer
0,23471 Nu was gein in kumen dar
0,23472 Iosue mit al der gotis schar
0,23473 Di bevilte sere ir craft
0,23474 Suomeliche wurden zagehaft
0,23475 Wan sie gienc angist an
0,23476 Wie sie in mochtin widirstan
0,23477 Di angist tet in harte we
0,23478 Do sprach got zu iosue
0,23479 “In vuorchte nicht dise schar
0,23480 Wis uor in ane angist gar
0,23481 Ich wil dir morgin gebin
0,23482 Ir gezuoc . ir gut . ir lebin
0,23483 Vf ir selbis ungewin
0,23484 Ir ros di solt u in
0,23485 Hessin . ir wagene in brennen
0,23486 Alreste wirdis tu irkennen
0,23487 Min helfe vnd minen trost”
0,23488 Do wurden sie sorgin irlost

0,23489 Do sie daz uirnamen
0,23490 Des andirn tagis kamen
0,23491 Zu einandir beide her
0,23492 Mit harte manlichir wer
0,23493 Wart irhaben der strit
0,23494 Daz in uil kurzir zit
0,23495 Vil manigir sin ende do nam
0,23496 Der in hoem mute dar kam
0,23497 Vnd an di groze craft sich lie
0,23498 Di dise kuonige hie
0,23499 Hattin dar gein in bracht
0,23500 Mit vnzalhaftir macht
0,23501 Got liez den sinen
0,23502 Sinen trost mit helfe schine-
0,23503 Wan er sluc di heidinschaft
0,23504 So daz sie wurden zagehaft
0,23505 Vnd israhel gesigete sundir not
0,23506 Der heidin bleib so uil tot
0,23507 Daz iz was ane zal
0,23508 Vnd hubin sich zu vluchte al
0,23509 Do sie sus uirzaitin
0,23510 Gotis helde in nach iaitin
0,23511 Vnd slugin ir uil ane wer
0,23512 So daz der heidene her
0,23513 Almeist irslagin wart
0,23514 Ir lip was uil ungespart
0,23515 Wan sie bliben alle tot
0,23516 Ane di di mit grozir not
0,23517 Von in di vlucht gewuonnen
0,23518 Vnd in etliche ueste untrunnen
0,23519 Da ir uil luoczel genas
0,23520 Der selbin so wenic was
0,23521 Daz sie mit unwerde
0,23522 Glichte puluere der erde
0,23523 Des man uil kleine war tut
0,23524 Sie wurden oc irslagen gar
0,23525 Wan in got nicht in ruchte
0,23526 Der sie selbe uiruluchte
0,23527 Nu was lange uor geseit
0,23528 Chananeus kunne mit warheit
0,23529 Daz gotis geheiz hatte benant
0,23530 Israhelis kunne . gar ir lant
0,23531 Durch daz machiten s in ir riche
0,23532 Vil uestin . gar werliche
0,23533 Vnd haten di sere wol bewart
0,23534 Abir nach der uzuart
0,23535 Sint di israhelische diet
0,23536 Von egyptenlande schiet

0,23537 Vnd in ir kumft wart irkant
0,23538 So hatten s lange uor ir lant
0,23539 Geuestint . daz chein man
0,23540 In iz hette gewonnen an
0,23541 Wan daz iz got also wolde
0,23542 Vn- uon im wesin solde
0,23543 Daz sin geheiz blibe war
0,23544 Daz er in vor vil manic iar
0,23545 Dicke vn- ofte hete geta-
0,23546 Als ich uch uor geseit han
0,23547 Des muste in manige stunt
0,23548 Vil arbeit werdin kunt
0,23549 Durch ir sunde uil werliche
0,23550 E . sie besezin di riche
0,23551 Vnd e in wuorde undirtan
0,23552 Di lant in chanaan
0,23553 Nu greif der gotisman
0,23554 San di nehistin lant an
0,23555 Mit der israhelischin schar
0,23556 Vn- uirwustin di gar
0,23557 Di in ir teile soldin wesin
0,23558 Da liezin s nieman genesin
0,23559 Er were iunc . cranc . odir alt
0,23560 Biz sie uil gar in ir gewalt
0,23561 Gewunnen gewaldecliche
0,23562 Ir geheizene riche
0,23563 Als in got da uor gehiez
0,23564 Vnd uil heiden dr uombe uirstiez
0,23565 Di kint . wip . lip . vnd lebin
0,23566 Mustin dar umbe gebin
0,23567 Daz gotis geheiz wuorde war
0,23568 Nu was daz vuomfte iar
0,23569 Kumen dar binne hate so vil
0,23570 Vnd gewonnen in dem zil
0,23571 Gutis vnd richir habe
0,23572 Di sie den uiendin abe
0,23573 Brachin . vnd si vurten dan
0,23574 Do sich ir kric stillin began
0,23575 Vnd sie nicht widirsaczis me
0,23576 Vundin do vur iosue
0,23577 Mit der israhelischin diet
0,23578 Vnd sich der kric beschiet
0,23579 Heim . vnd machite do
0,23580 Blibens heimute in sylo
0,23581 Wan di stat dem riche
0,23582 Nach wuonsche wuonschliche
0,23583 In zu nidirlage was gelegin
0,23584 Aldar vurte der gotisdegin

0,23585 Gotis arkin vnd liez sie da
0,23586 Di was da uor in galgala
0,23587 Di selbin vumf iar gewesin
0,23588 Als ich uir war han gelesin
0,23589 Dit allir var vur er do
0,23590 In sichem von sylo
0,23591 Vnd machite do einin altir gote
0,23592 Vf ebal . nach der e gebote
0,23593 Brachte da der saldinriche
0,23594 Sin opphir uil reinecliche
0,23595 Mit warer innecheite da
0,23596 Vnd screib uf dem altere sa
0,23597 Daz buch uon gotis e
0,23598 Dar nach in beit er nicht me
0,23599 Er ne teilte an den ziten
0,23600 Ewartin vnd leuiten
0,23601 Vffe ebal dem berge vor im
0,23602 Vnd uffte dem berge garizim
0,23603 Da sie den segin soldin gebin
0,23604 Vbir der salde unde ir lebin
0,23605 Di dise gotis e behieldin
0,23606 Vnd ubir di sie uirschioldin
0,23607 Ouch den vluch als in der e
0,23608 Gebotin was von moyse
0,23609 Da uor . daz vol vurt er do
0,23610 Da na kert er gein sylo
0,23611 Vnd lech dem kunne von iuda
0,23612 Gein sudirt als daz gebirge sa
0,23613 Di ein sloz waren der riche
0,23614 Di hatten sie kuorczliche
0,23615 Gewunnen bi den tagen
0,23616 Als wir horen di warheit sagen
0,23617 DI gebirge westirhalb von im
0,23618 Nam daz kuonne uon effraym
0,23619 Vnd hattin da mite uil warliche
0,23620 Di sloz der kuonicriche
0,23621 Zwischin den zwein kuonnen sa
0,23622 Hiez er sich nidir lazen da
0,23623 Daz halb kuonne uon manasse
0,23624 Daz andir teil was uon moyse
0,23625 Vor des behusit in basan
0,23626 An dise geslechte wold er lan
0,23627 Di hoistin vesten . vnd daz lant
0,23628 Wan sie ie werliche hant
0,23629 Trugin mit vestim muote
0,23630 Ouch irkante an in der gute
0,23631 Daz sie uil hoer waren gar
0,23632 Vnd werdir dan di andir schar

0,23633 Vnd daz iz got also wolde
0,23634 Daz iudas uor uz nemin solde
0,23635 Gewaldecliche unde schone
0,23636 Ir sceptir . vnd di crone
0,23637 Vnd sin kuonne solde ir phlegin
0,23638 Als iacob in gab den segin
0,23639 Yosebis kindin nach im
0,23640 Manasses vnd effraym
0,23641 Daz di ouch soldin tragin
0,23642 Di crone zu etlichin tagin
0,23643 In israhel mit gewalt
0,23644 Iosue der mere degin balt
0,23645 Was uon effraym geboren
0,23646 Uon der gewalt wart er irkorn
0,23647 Durch di vruntliche site
0,23648 Daz sin geslechte behielde mite
0,23649 Durch der selbin liebe craft
0,23650 Vn- an geborne sippeschaft
0,23651 Gab der gotisdegin iosue
0,23652 Dem geslechte vuorbaz me
0,23653 Dan im beschiede rechtir teil
0,23654 Vnd des lozis wariz seil
0,23655 Er gab im sichem zuhant
0,23656 Wan der gotis liebir wigant
0,23657 Iacob iosebe irn vatir liez
0,23658 Des erbis er sie nicht uirstiez
0,23659 Er n machit iz in undirtan
0,23660 Vnd hiez sie z vor n andirn han
0,23661 Vnd besiczen mit werdecheit
0,23662 Von in wart ouch geleit
0,23663 Vnd begrabin iosebis gebeine
0,23664 Daz heilige daz reine
0,23665 Daz uon egypte di schar
0,23666 Hatten mit in gevuort dar
0,23667 Als ich da uor ouch saite
0,23668 Caleph der unvirzaite
0,23669 Vnd den da uor mit iosue
0,23670 Hatte der wise moyses e
0,23671 Vz der wustene gesant
0,23672 Duorch uirspehene daz lant
0,23673 Daz sie soldin besizzin sit
0,23674 Vnd iz ouch taten bi der zit
0,23675 Als uns di schrift uiriach
0,23676 Der gienc zu yosue vnd sprach
0,23677 “Weist u geselle daz uon mir
0,23678 Got selbe sprach unde uon dir
0,23679 Do wir her waren kumen
0,23680 Durch spehin vn- hatten genome-

0,23681 Des landis war . wie got sprach
0,23682 Do unse widirvart geschach
0,23683 An swelchche stat wir tretin
0,23684 Daz wir di selbin hetin
0,23685 Eiginliche des ist uir war
0,23686 Hute vumf vnd zweinzic iar
0,23687 Vnd wir in der spehe enach
0,23688 Sahin . vnd moyses an der stat”
0,23689 Sprach der degin uil balt
0,23690 “Nu bin ich vumf vn- achzic iar alt
0,23691 Vnd mac noch als wol als do
0,23692 Daz geschach vnd irgienc also
0,23693 Hie solt u nu gedenkin an”
0,23694 Do gab im iosue san
0,23695 Der werde gotis degin
0,23696 Gotis . vnd ouch sinen segin
0,23697 Vnd gab im ebron zuhant
0,23698 Zu rechtim erbe da di lant
0,23699 Vnd ouch di kuonicriche
0,23700 Bliben ganz vnd vrideliche
0,23701 Mit rue ane urlouge gar
0,23702 So daz sich nieman mit in war
0,23703 Mit urlouge bi den tagin
0,23704 Wan sie waren meist irslagin
0,23705 Gein den sie mustin uorchte ha-
0,23706 Vmbe di in chanaan
0,23707 Zu sich besante zu sich do
0,23708 Iosue daz lut . zu sich also
0,23709 Vnd sprach zuz in . “ich bin nu alt
0,23710 Gein abgendir zit gestalt
0,23711 Mit duonkit gut . daz wir di lant
0,23712 Di uns got z erbe hat benant
0,23713 Mit glichin teilin . teilin gar”
0,23714 Di rede behaite wol der schar
0,23715 Als in der wise man riet
0,23716 Do nam er uor al der diet
0,23717 Vz ieslichim geslechte dan
0,23718 Dri wol bescheidene man
0,23719 Vnd hiez den teil beschin
0,23720 Geleginheit der lande spehin
0,23721 Wie sie di teilin woldin
0,23722 Den . di teil habin soldin
0,23723 Vnd schuf zehin man zu in
0,23724 An den man wisheit vnd sin
0,23725 Genczliche hate irkant
0,23726 Wie man teilin mochte di lant
0,23727 Vnd bat sie innecliche
0,23728 Daz sie in teiltin di riche

0,23729 Rechte nach der lande genucht
0,23730 Vnd nach ir berindir vrucht
0,23731 Vnd nach ir geleginheite
0,23732 Nicht nach der lande breite
0,23733 Hiez sie der gotiswigant
0,23734 Gliche teilin in di lant
0,23735 Vnd di teil uor beschriben
0,23736 Als sie immir solden bliben
0,23737 DI botin vuren zuhant
0,23738 Vnd besahin ebine di lant
0,23739 Vnd schribin di geleginheit
0,23740 Ie nach des nucztes undirscheit
0,23741 Was des minnern teilis genucht
0,23742 In bezzir ueizte mit vrucht
0,23743 Danne der merir teil irkant
0,23744 Den machiten sie zuhant
0,23745 Dem merrem teile glich
0,23746 Vnd durch die suoze ebinrich
0,23747 Vnd des ein lant hatte gnuc
0,23748 Ob des daz andir mangil truc
0,23749 Dar zu gein wart zuhant geleit
0,23750 Nuczis ein gliche richeit
0,23751 Sus teiltin sie uil gliche
0,23752 Di teil der kunicriche
0,23753 So daz di teil gliche bliben
0,23754 Di teil sie ouch uor beschriben
0,23755 Vnd daz kunne dem ieclich lant
0,23756 Mit sinem teile was benant
0,23757 Vnd brachtin di brive widir
0,23758 Vbir sibir mande sidir
0,23759 Kamen s zu iosue in sylo
0,23760 Vnd wisten im di briefe do
0,23761 Den erstin teil den man las
0,23762 Nam daz kuonne von iudas
0,23763 Symeon den andirn nam
0,23764 Der dritte teil zu teile kam
0,23765 Dem geslechte benyamin
0,23766 Der selbe teil was undir in
0,23767 Der engiste mit suzir craft
0,23768 Daz lant veizte wol berhaft
0,23769 Von ierusalem biz zu ieriche
0,23770 Geviel im mitteile also
0,23771 Den vierdin teil nam effraym
0,23772 Als uor was bescheidin im
0,23773 Vnd lange benennit e
0,23774 Daz halb kuonne manasse
0,23775 Nam den vuomften teil gar
0,23776 Vnd den sechstin ysachar

0,23777 Den sibinden der lande hie
0,23778 Zabulon mit loze vntphie
0,23779 Aser den achten teil besaz
0,23780 Als im daz loz zu teile maz
0,23781 Neptalim der nuonde wart
0,23782 Zu teile uf dirre vart
0,23783 Der zehinde teil wart vndirtan
0,23784 Dem geslechte von dan
0,23785 Drittehalbim geslechte was
0,23786 Wordin ir teil . als ich las
0,23787 Ruben . gad . vnd manasses
0,23788 Als in hatte gewiset moyses
0,23789 Vnd gemachit uor vndirtan
0,23790 Amorrea . vnd basan
0,23791 Vnd galaad di lant
0,23792 Di waren in voruz benant
0,23793 Ierusalem ouch kuomen was
0,23794 In den teil den iudas
0,23795 Hatte vnd besaz mit craft
0,23796 Dar inne di heidinschaft
0,23797 Saz mit werlichem mute gar
0,23798 Vnd iebuseus ouch gebar
0,23799 Der in von erste den urhab
0,23800 Vnd stift mit namen gab
0,23801 Die ne mochte in langen tagen
0,23802 Iudas danne nicht uiriagen
0,23803 Doch wart nach im sin lant
0,23804 Vnd sin teil iudea genant
0,23805 Chaleph der werde gute man
0,23806 Ebron zu sinem teile gewan
0,23807 Vnd iosue nam im zu teile da
0,23808 Vnd sinem kunne thannata
0,23809 Da uor im vnd e . sinen ziten
0,23810 Ouch wurden den leuiten
0,23811 Achzen stete e wordin
0,23812 Vnd waren nach ir ordin
0,23813 Vndir sie zuteilit her vnd dar
0,23814 In der andirn geslechte schar
0,23815 Als in mit gotis undirscheit
0,23816 Moyses ir teil hatte uf geleit
0,23817 Nu giengin iosebis kint
0,23818 Di uch ofte genennit sint
0,23819 Zu iosue dem vurstin do
0,23820 Vnd sprachin zuz im also
0,23821 “Noch mere teile sundir list
0,23822 In weist u nicht daz unsir ist
0,23823 Vil me dan iemans si
0,23824 Vnd uil crefte uns ist bi

0,23825 Swa man uns varn sicht
0,23826 Vnd hast uns doch des erbis nicht
0,23827 Deste me gegeben . durch daz
0,23828 Noch mit geteilit vurbaz
0,23829 Wan als oc einir kunneschaft
0,23830 Vnd wir doch lute . wer craft
0,23831 Vnd vil geslechtis habin me”
0,23832 Mit zuchtin sprach do iosue
0,23833 “Ich weiz daz uwir her
0,23834 Hat luote uil . craft vnd wer
0,23835 Welt ir den teil nicht stete han
0,23836 Der uch zu teile ist hie uirlan
0,23837 So sult ir mit uwirn scharn
0,23838 In daz edele gebirge varn
0,23839 Dannen mac uwir vrechte hant
0,23840 Sere witen vwir lant
0,23841 Vnd gewinnen richeit vil
0,23842 Vbir der lande gemerke zil
0,23843 Di uch gotis geheiz hat benant
0,23844 Vnd zu erbin nu dr in gesant
0,23845 Daz muogit ir wol uolbringen
0,23846 Welt ir s mit creftin twingen”
0,23847 Alsus zuteiltin sie di lant
0,23848 Di in got selbe hatte benant
0,23849 Vnd twungen sie vndir sich
0,23850 Mit creftin allir tegelich
0,23851 So daz gar dientin ir hant
0,23852 Beide burge stete vnd lant
0,23853 Chaleph vuor mit den sinen sa
0,23854 In ebron vnd vant ouch da
0,23855 Der risen kunnes von enach
0,23856 Dri groze risen nicht zu schwach
0,23857 Die uil luten vugetin not
0,23858 Di belagen von im tot
0,23859 Al ir stete er in abe gewan
0,23860 Der edele gotisman
0,23861 Intwelte nicht vuorbaz
0,23862 Eine groze stat er besaz
0,23863 Di han ich uoch genennit e
0,23864 Wan di betwanc iosue
0,23865 Als ir wol habit uirnumen
0,23866 Di was nu widir kumen
0,23867 Vnd mit gebuwe gevestit so
0,23868 Daz sie dachtin daz sie iman do
0,23869 Nach den selbin geziten
0,23870 Mit sturme mochte irstriten
0,23871 So ueste was sie nu irkant
0,23872 Do lobite der gotiswigant

0,23873 Zu gebene sine thochtir sa
0,23874 Di was geheizin axa
0,23875 Vnd di stat einim man
0,23876 Swer sich daz torste nemin an
0,23877 Daz er s nach manlichem site
0,23878 Irsturmete . vnd irstrite
0,23879 Nu was mit im kumen dar
0,23880 An daz gesecze in sinir schar
0,23881 Othoniel ein warer helt
0,23882 An tuoginden gar uzirwelt
0,23883 Der da mit grozir manheit
0,23884 Mit den sinen di selbe irstreit
0,23885 So daz der ellinsriche man
0,23886 Mit sturme di stat gewan
0,23887 Vnd di irgab sich im sa
0,23888 Chaleph zu solde gab im da
0,23889 Axam sine thochtir als ich sprach
0,23890 Nach kurzin ziten man sach
0,23891 Den selbin ellinthaftin degin
0,23892 Mit craft gewaldecliche phlegin
0,23893 Der israhelischin schar
0,23894 Vnd richte sie ettelich iar
0,23895 Als uch her na wirdit kunt
0,23896 Alle dise zit vnd dise stunt
0,23897 Hatten betwungen sere
0,23898 Ie vuorbaz . vnd mere
0,23899 Israhelis kint mit craft
0,23900 Vndir sich di heidinschaft
0,23901 Biz daz sie sich allir uorchten
0,23902 Machtin ledic vnd vntworchten
0,23903 Vnd ir erbe lant besazin
0,23904 Ir teil mit teilin uz mazin
0,23905 Als ouch gotis ordin wolde
0,23906 Vnd ir ieclichim werdin solde
0,23907 Mit sunderim teile alhie
0,23908 Als iz ouch sint alliz irgie
0,23909 IN disen ziten was uir war
0,23910 Kumen daz uierzende iar
0,23911 Daz sie sich zuteiltin gar
0,23912 In ir lant . dirre her . ienir dar
0,23913 Ieclich in sin bescheidin lant
0,23914 Daz im mit loze was benant
0,23915 Von gote als ich uch saite e
0,23916 Nu besante zu sich iosue
0,23917 Die drittehalbe kuonnis schar
0,23918 Vnd als di vor in kamen dar
0,23919 Er sprach zu in . “ir hat getan
0,23920 Vnd daz stete ie noch gelan

0,23921 Ruben . gad . vnd manasses
0,23922 Als uch hiez moyses
0,23923 Vnd uon gote gebot .” sie saitin “ia”
0,23924 Iosue sprach zuz in abir sa
0,23925 “Sint got ru vnd semftiz lebin
0,23926 Vwirn brudirn hat gegeben
0,23927 So vart heim in uwir lant
0,23928 Gotis e sit immir gemant
0,23929 Vnd da bi daz ir huotit gotis
0,23930 Sit vliezic sinis gebotis
0,23931 Kerit uch nicht an vremide gote
0,23932 Daz ir in uolgit uz gotisgebote
0,23933 Wan nu leidir zu keinir vrist
0,23934 Gotis gezelt noch arke bi uch ist
0,23935 Vnd luoczel iman der uch mane
0,23936 Von dem hoistin gote . dar ane
0,23937 Denkit . daz ir uon im icht kerit
0,23938 Got hat uch uil wol gemerit
0,23939 Mit gewinne uwir habe
0,23940 Dar an sult ir nicht brechin abe
0,23941 Uwirn bruodirn den gewin
0,23942 Ir ne teiltin gliche mit in”
0,23943 Da mit vuren sie zuhant
0,23944 Vnd besazin gern ir lant
0,23945 Daz sie mit teile was an kumen
0,23946 Als ir da uor habit uirnumen
0,23947 Vnd buwetin vrideliche daz
0,23948 Kuorczlich sidir vnd vurbaz
0,23949 Wolden sie nach der e gebote
0,23950 Lebin . vnd machtin sa gote
0,23951 Einin altir als daz geschach
0,23952 Vnd do man den bereitit sach
0,23953 Do was er so groz vnd so hoch
0,23954 Daz er sich mit beidin zoch
0,23955 Verre uz gewonlichim site
0,23956 Hie woldin sie irzeigin mite
0,23957 Daz got ist got . ouch brachti- sie
0,23958 Gote uil grozlich opphir hie
0,23959 Als do was site in gotis e
0,23960 Do der gotis degin iosue
0,23961 Von in gevriesch di mere
0,23962 Daz sie so groz den altere
0,23963 Vnd so wit gemachit hetin
0,23964 Vnd wie sie lebten vn- wie sie teti-
0,23965 Vil groze uorchte er s gewan
0,23966 Sie hetin z in dem mute getan
0,23967 Daz sie dr uffo opphirn wolden
0,23968 Andirs dan sie solden

0,23969 Vnd wolden got ubirhorin
0,23970 Virterbin vnd zustorin
0,23971 Wold er s hier umbe gar
0,23972 Doch sant er botin dar
0,23973 Finees vnd uon den scharn
0,23974 Der hoisten zehine di irvarn
0,23975 Solden in dise selbin mere
0,23976 War vmbe z geschen were
0,23977 Als di botin kamen hin
0,23978 Sie vragetin s . vnd saitin z in
0,23979 Waz sie hie mit meintin
0,23980 Daz sie n daz irscheintin
0,23981 Sie beduchte an disen sachin
0,23982 Sie woldin ir e swachin
0,23983 Vnd ubirhoric sin gote
0,23984 Vnd nicht haldin di gebote
0,23985 Di uns got hat uirlan
0,23986 “Ir hat widir gehorsam getan”
0,23987 Dise sprachin gemeinliche do
0,23988 “Nein wir nicht iz ist nicht so
0,23989 Wir vorchtin daz uwir kint
0,23990 Di nach uch noch kumftic sint
0,23991 Zu unsirn her nach durch gerich
0,23992 Sprechin uillichte so sie sich
0,23993 Mit vremede schiedin . “wer sit ir
0,23994 Odir wannen . waz habe wir
0,23995 Mit uch zu tunde .” widir got
0,23996 Getate wir z nie . uz sinem gebot
0,23997 Wolde wir uil vngerne kuomen
0,23998 Diz ist als ir habit uirnuomen
0,23999 Gar ane valsche vnd gewere
0,24000 Des sie got unsir richtere
0,24001 Vnd ein ewic uorkunde daz wir
0,24002 Nicht andirs dan als ir
0,24003 Nach warem gotlichim rechte
0,24004 Gotis diensthaftin knechte
0,24005 Sin . vnd immir gerne gehorsa-”
0,24006 Vnd als daz finees uirnam
0,24007 Er wart uil innecliche vro
0,24008 Hie mite kertin sie widir do
0,24009 Vnd kundetin dort dise mere
0,24010 Wie in gantwurtit were
0,24011 Des vreute sich di schar
0,24012 Vnd lobten s got uon h’zin gar
0,24013 Nu alreste ubir alle dise iar
0,24014 Was dirre wunsch wurde- war
0,24015 Den nach der sintvluote noe
0,24016 Wunschte sinen kindin e

0,24017 Eiginliche was chanaan
0,24018 Seme nu wurdin vndirtan
0,24019 Als im sin wunsch do geriet
0,24020 Wan di israhelische diet
0,24021 Was uon semis kuonne kumen
0,24022 Vnd ir urhab an im genumen
0,24023 Von di besazin sie nu uroliche
0,24024 Di selbin zehin kunicriche
0,24025 Di waren uon chanaan
0,24026 Von den ich e gesait han
0,24027 Alsus rach vnsir h'regot
0,24028 An chanaane . chamis spot
0,24029 Den er an sinem uatir noe
0,24030 Virdiente . als ich sprach e
0,24031 Mit unvruontlichir unzucht
0,24032 Me dan uf di zehinde vrucht
0,24033 Ouch hatte got abrahamen
0,24034 Vnd sinis kunnis samen
0,24035 Vroliche gesazt in di lant
0,24036 Als in sin geheiz hate benant
0,24037 SIdir ubir etteliche zit
0,24038 Als di schrift urkunde uns git
0,24039 Besante iosue al di schar
0,24040 In sichem zu sich gar
0,24041 Also sprach er zu dem lute
0,24042 "Ich sol . vnd werde varn huote
0,24043 Den wec . den alliz lebin vert
0,24044 Dem vleischlich lebin ist beschert
0,24045 Vnd weiz" sprach der degin gut
0,24046 "Vch also lichtlichin gemuot
0,24047 Daz ir schiere vnd drate gotis
0,24048 Vch bewegit vnd sinis gebotis
0,24049 Als ich uon uch gescheidin bin
0,24050 Ir habit so wandilberin sin
0,24051 Nu muz ich uch legin vur
0,24052 Ir tut licht uwir willekur
0,24053 Daz ir uon gote uch scheidit
0,24054 Vnd uch dar zu gote leidit
0,24055 Dem ir zu dieniste zemit
0,24056 Vnd andir gote uch nemit
0,24057 Als uwir uordern tatin
0,24058 Vnd sie vur got an batin
0,24059 Ich meine in mesopotamia
0,24060 Vnd mangin endin andirswa
0,24061 Odir welt lichte zu gote han
0,24062 Dem amorre undirtan
0,24063 Waren . hie uil manige zit
0,24064 Der lande ir nu gewaldic sit

0,24065 Vnd besezzin habit ir gut
0,24066 Swaz ir an disen dingen tut
0,24067 Allirgernist . daz tut ir
0,24068 Ich vnd di sint mit mir
0,24069 Wellin durch keine geschicht
0,24070 Vom me hoistin gote scheidin nicht”
0,24071 DO sprach gemeinliche gar
0,24072 Als uz einim munde di schar
0,24073 “Wir wellin immir mit steticheit
0,24074 Gote mit dieniste sin bereit
0,24075 Got in welle daz daz gesche
0,24076 Daz man uns uon im se
0,24077 Scheidin . nu . her nach . odir sit”
0,24078 Iosue sprach zuz in an der zit
0,24079 “Sol des got uwir urkunde sin
0,24080 Vnd ein gezuoc uwir vnd min
0,24081 Mit wernder stete daz ir
0,24082 Gote nach einis herzin gir
0,24083 Zu me hoisten gote hat irkorn
0,24084 Vnd mit geluobede im gesworn
0,24085 Sichirheit .” sie sprachin “ia
0,24086 Des si wir gotis gezuge sa
0,24087 Daz wir z immir stete han”
0,24088 Do diz also was irgan
0,24089 Sie kertin gemeinliche do
0,24090 Mit iosue hin gein sylo
0,24091 Vnd bestetin da di sichirheit
0,24092 Als dort was uon in uf geleit
0,24093 Dem hoisten gote immir me
0,24094 Do nam der degin iosue
0,24095 Ein wazzir vnd goz daz hin
0,24096 Vf di erde alda vor in
0,24097 Mit dem sinne als er spreche
0,24098 Swer dise sichirheit breche
0,24099 Di man gote da swuore
0,24100 Daz der also zuvuore
0,24101 Mit alle sime gesinde
0,24102 Huse . vihe wibe kinde
0,24103 Als daz wazzir was zuvarn
0,24104 Also wart gote uon al den scharn
0,24105 Gesworn . vnd mit eide uf geleit
0,24106 Ein immir wernde sichirheit
0,24107 Vnd di stete werte immir mer
0,24108 Sundir wankils umbeker
0,24109 Als ir daz uolk da wart inein
0,24110 Des hiez uf richtin einin stein
0,24111 Iosue der gotiswigant
0,24112 Daz da bi were irkant

0,24113 Ein warzeichin der sichirheit
0,24114 Also di da was uf geleit
0,24115 Dise geschicht vnd al dise wort
0,24116 Von angenge biz an z ort
0,24117 Schreib do der degin iosue
0,24118 An daz buch der gotis e
0,24119 Zu einir ewigin gehugede dar
0,24120 Vrloub nam do al di schar
0,24121 Ieclich wart des inein
0,24122 Daz er kerte widir heim
0,24123 Do di sichirheit geschach
0,24124 Ane vrlougis vngemach
0,24125 Hatten sie nu semftiz lebin
0,24126 Got hatte in nu rue gegeben
0,24127 Daz sie ane arbeite vmbeiage
0,24128 Waren . uil manige tage
0,24129 Kuorzlich dar na sit
0,24130 Kam di stunde vnd di zit
0,24131 Daz der uil reine iosue
0,24132 Ein schilt . ein dach der gotis e
0,24133 Voit der israhelischin diet
0,24134 Von dirre brodin werlde schiet
0,24135 Der ie nach gotis erin warb
0,24136 Nach gemeinem siten er starb
0,24137 Vnd vur zu sinen genozen
0,24138 Gotis irweltin den grozen
0,24139 In der zit do der degin balt
0,24140 Was hundirt vnd zehin iar alt
0,24141 Vnd als er zu moyse kam
0,24142 Alreste . vnd er an sich nam
0,24143 Der im phlichte gab vn- gewalt
0,24144 Do er was zwenzic iar alt
0,24145 Er dient im gutlich uir war
0,24146 In der wuostin vierzic iar
0,24147 Vnd der schar hatte der degin
0,24148 Sabin vnd zwenzic iar gephegin
0,24149 E daz er nu gelege tot
0,24150 Als menschlich recht gebot
0,24151 Vil sere wart er geklait
0,24152 Der helt vil unvirzait
0,24153 Wart begrabin vil herliche sa
0,24154 In sinir stat thannata
0,24155 Di lac bi monte effraym
0,24156 Di mit erbe was wordin im
0,24157 Der gotis ewart eleazar
0,24158 Der obirste ubir al di schar
0,24159 Starb kurzlich dar na sit
0,24160 San ubir uil unlange zit

0,24161 Der wart begrabin in gabaa
0,24162 Nach im kos daz uolc sa
0,24163 Finees der uon im geboren
0,24164 Was . den ich uoch hie beuorn
0,24165 Ofte unde dicke han genant
0,24166 Wan der selbe wigant
0,24167 Was zu rechte so uolkumen
0,24168 Daz er wart genumen
0,24169 Zu des amachtis werdicheit
0,24170 Als uon gote was uf geleit
0,24171 Der in zu der herschaft nam
0,24172 Di do niemane bat gezam
0,24173 Als iz got hatte uor gedacht
0,24174 Vnd sin kuonne an in bracht
0,24175 Von angeborner sippecraft
0,24176 Von art mit erbeschaft
0,24177 Hier undir muz ich ouch sagin
0,24178 Wer bi den selbin tagin
0,24179 Vbir der heidene hoe lant
0,24180 Di hoistin kunige waren genant
0,24181 Pandion truc do schone
0,24182 Zu attene des landis crone
0,24183 Vnd was gewaldic kunic da
0,24184 Prognos . vnd phylomena
0,24185 Waren sine tochtere genant
0,24186 Von den tut di fabele irkant
0,24187 Wundirlichir mere gnuc
0,24188 In den ziten ouch crone truc
0,24189 Belochus in dem lande assiria
0,24190 Mit dem rissende ouch da
0,24191 Sin tochtir ubir daz lant
0,24192 Di was di schone rose genant
0,24193 Des ist di fabele min wer
0,24194 Der minne gerndir iupiter
0,24195 Minnete in den selbin tagin
0,24196 So hore wir di fabel sagin
0,24197 Ein vrouwe schone vnd wert irkant
0,24198 Di was europa genant
0,24199 Di wante sundir spot
0,24200 Er were ein werdir got
0,24201 Dar umbe sie in minnen liez
0,24202 Ein kuonic fenix ir uatir hiez
0,24203 Dem wart sie do genuomen
0,24204 Man sach di uon crite kumen
0,24205 Mit eime schiffe ubir mer
0,24206 Di mamen sie da ane wer
0,24207 Xanckus gewan sie sint widir
0,24208 Vnd vurten s zu lande sidir

0,24209 Vnd gewan bi ir mynoem
0,24210 Radamanten vnd sarpidonem
0,24211 Von den kundit uns daz mere
0,24212 Daz iupiter ir uatir were
0,24213 Durch daz iach di heidinschaft
0,24214 Im mit valsche gotlichir craft
0,24215 Wan sie zu crichen ir zit
0,24216 Taten manic wundir sit
0,24217 Chatinus ein creftir wisir degi-
0,24218 Sach man zu thebe crone tragi-
0,24219 Do diz geschach als ich saite e
0,24220 Er hatte ein tochtir hiez semele
0,24221 Di selbe sint zu sune gewan
0,24222 Einen wisen werdin man
0,24223 Der was genant dionisius
0,24224 Der frigien vatir hiez bachus
0,24225 Der sidir wundirs uil
0,24226 Tet zu crichin sine zil
0,24227 Chatinus den ich han genant
0,24228 Vnd fenix ein stolcz wigant
0,24229 Von thebe vuren do mit her
0,24230 Vnd besazin mit starkir wer
0,24231 In einir inselin hiez zirta
0,24232 Von dan betwungen sie sa
0,24233 Thyre . vnd sydonie di lant
0,24234 Daz sie dientin sint ir hant
0,24235 Anphyon vnd einir hiez zetis
0,24236 Vnd der vil wise lynus
0,24237 Vbetin bi der selbin vrist
0,24238 Kuonstlichen musicam di list
0,24239 Vnd waren dr an uolkumen
0,24240 Bi den ziten uzgenumen
0,24241 Swaz uon dyanen was geseit
0,24242 An den fabelin mit warheit
0,24243 Von der ein degin uzirkorn
0,24244 Perseus sint wart geborn
0,24245 Vnd geschach bi den geziten sin
0,24246 Beide lant stat zu chorinthin
0,24247 Wurden bi den geziten do
0,24248 Gestiftit uon sistpho
0,24249 Fenix mit creftin stifte sa
0,24250 Daz lant zu bithynia
0,24251 Di starke ueste tharsus
0,24252 Vnd di creftige paphus
0,24253 Wurdin beide gestiftit do
0,24254 Diz geschach vn- irgienc also
0,24255 IN sicionie sach man tagin
0,24256 Crone zu den selbin tagin

0,24257 Einin heidenischin wigant
0,24258 Lamedon was er genant
0,24259 Zu den arguwen do kuonic was
0,24260 Ein hoer kuonic hiez arbas
0,24261 Nu do diz alliz sus irgie
0,24262 Als ich han gesprochin e
0,24263 Vnd daz der degin iosue
0,24264 Was tot . als ich ouch saite e
0,24265 Vnd der ewarte eleazar
0,24266 Di israhelische schar
0,24267 Was gar ane wisere worden
0,24268 Vnd an der lere gotis orden
0,24269 Kundin sich uirrichtin nicht
0,24270 Durch di selbe geschicht
0,24271 Baten sie uon al den scharn
0,24272 Finees ingein gote irvarn
0,24273 Wen er in nu vuogen wolde
0,24274 Daz er in vor wesin solde
0,24275 Mit rate mit lere mit craft
0,24276 Gein chanaan der heidinschaft
0,24277 Di gein in saz mit wer do
0,24278 Got vndirwisete sie also
0,24279 Daz daz geslechte uon iudas
0,24280 Vnd daz uon im geborn was
0,24281 Solde ir leiter nu wesin
0,24282 Nu hab ich warlich nicht gelesin
0,24283 Ob iz were daz kuonne gar
0,24284 Odir ein man uz der schar
0,24285 Doch iehint suomeliche
0,24286 Daz der edile saldinriche
0,24287 Chaleph der wise gotis degin
0,24288 Des hers got selbe hieze phlegin
0,24289 Der des selbin kuonnis was
0,24290 Daz mechtige kuonne uon iudas
0,24291 Zu symeonis kunne sprach
0,24292 Daz man ouch stark mehtic sach
0,24293 “Kere in unsir teil zu mir
0,24294 Vnd hilf mir ich helfe dir”
0,24295 Daz wir an disen geziten
0,24296 Mit chananeo ouch striten
0,24297 Den uil creftigin heidin
0,24298 Von den geslechtin beidin
0,24299 Wart ein sicherheit getan
0,24300 Wisliche giengin sie z an
0,24301 Als di sichirheit geschach
0,24302 Di zwei kuonne man sach
0,24303 Varn mit grozir herschaft
0,24304 Vf di uirvluchtin heidinschaft

0,24305 Di in besech wonende was
0,24306 Symeon . vnd der helt iudas
0,24307 Slugen da zehin tusint man
0,24308 E daz sie schiedin von dan
0,24309 Vnd viengin in dem strite
0,24310 Einin man bi des zite
0,24311 Wart uil wundere irkant
0,24312 Adonibesech was er genant
0,24313 Den sie mit zornlichin siten
0,24314 An dem libe gar besniten
0,24315 Ich meine hende vnd vuoze abe
0,24316 Do er lant lip vnd sin habe
0,24317 Sus iemerlichin uirlos
0,24318 Suolche schumpheture kos
0,24319 Da uon sin pris wart uirleit
0,24320 Vnd sin kuoniclich werdecheit
0,24321 Vnd zu sulchir smaheite gedech
0,24322 Do sprach adonibesech
0,24323 “Ich sol . vnd muz von schuldin
0,24324 Dise schande . vnd schadin duldin
0,24325 Di an mir geschen ist
0,24326 Wan ich ie al mine vrist
0,24327 Den waren got nicht wolde
0,24328 Irkennin . als ich doch solde
0,24329 Der himel vnd erde hat
0,24330 Geschaffin . sin gotlich rat
0,24331 Ist wol irgangen an mir”
0,24332 Finito libro sit laus et gl’a xp-o